


ANG SINALIKWAY NGA HARI

 . . .aron nga maipahayag ang himaya sa Ginoo nangani kanato karong adlaw na pinaagi sa pagwali sa Pulong. Ug kini'y usa ka . . .

² Niadtong miaging semana diay, medyo dili maayo ang akong gibati. Hinoon dili man gyud nga dili maayo ang akong gibati; kondili aduna lang og usa ka eksaminasyon nga kinahanglan kong agian, usa ka pisikal nga eksaminasyon. Ug mao kadto ang inyong nabalitaan, nga atua ako sa ospital. Tungod sa maong eksaminasyon miadto ko didto aron dili na ko magbalik-balik pa og latas sa suba. Pag magpaeksamin ka sa ibabaw nga bahin sa imong tiyan, ug sa ubos nga bahin sa tiyan. Bueno gikinahanglan nila, nga sa matag pipila ka minuto, mobalik sila ug mag x-ray pag-usab. Hinoon kinahanglan man gyud namo nga moagi sa ingon-niadto nga mga pag-eksamin, sa kada unom ka bulan, pagmagbiyahe kami sa gawas-sa-nasud para sa pagpangmisyon. Ngani sila ni Igsoong Roberts, sa hunahuna ko, nagapa-eksamin pud sila sa kada unom ka bulan. Pero ako wala pa gyud ni kausa man lang sulod sa upat na ka tuig.

³ Ang problema man gud, dili gyud ko ganahan og castor oil, mao lang gyud kana ang problema. Ug ingon nila nga wala na kono sila'y uban pa nga maihatag, busa ako, oh, kasukaon gyud kaayo ko sa dihang ila akong gipainom niadto. Kabalo na man mo, gisultihan ko na kamo, sa kasaysayan sa akong kinabuhi, kon daw sa unsa nga makapasuka gyud kadto kanako. Ug—ug dili ko gayud unta gusto nga moinom niadto. Ug mao nga giingnan ko ang butan kong higala nga doktor, kung. . . “Wala na ba'y uban pa?”

Ug ingon siya, “Mora'g wala na gyud, Igsoong Branham.”

⁴ Oh, sa dihang miabot na kadtong gining nga nagdala niadto, siguro, basin sobra ra pud ko, apan, mora gyud kadto og ikaupat na nga bahin sa usa ka galon. Kadto—kadto'y. . .wala pa man gud ko sukad nakakita og ingon-niadto ka daghan. Ug gipislit ko na lang ang akong ilong ug minganga. Pero sa katapusan natulon ra gyud nako.

⁵ Busa karon, bisan sa tanan niadto nga mga pagsulay, ug tanan na niadtong kinahanglan kong agian, buut kong pasalamatang ang Ginoo tungod sa wala gayu'y problema nga eksaminasyon. Mipasar ako, sinto porsyento; mao nga puede na kong makabiyaha sa bisan asa man sa kalibutan nga gusto kong adtoan. Ngani akong gipangutana ang mga doktor, nga tulo sa pinakamaayong mga espesyalista, nga, sa—sa hunahuna ko, didto sa Louisville. Ug ako silang gipangutana, ingon ko, “Aduna ba ako'y balatian bisan diyes porsyento man lang?”

6 Miingon, “Wala gyud ka’y bisan usa ka tipik nga balatian.” Ingon—ingon pa, “Bug-os gyud ka nga himsog, sa tanang bahin.” Ug mao nga mapasalamaton kaayo ko sa Dios. Kang kinsa pa ba kini magagikan kondili sa ato lamang Langitnong Amahan, kita n’yo, nga ingon-niana ako ka himsog?

7 Ug ingon pa siya, “Ang imong... Nagapakita ang tanan mong mga eksaminasyon, dinha, nga batan-on ka pa.” Ingon siya, “Ang imong mga selula sa dugo wala pa gani misugod sa pagkunhod, o unsa man.” Ingon siya, “Himsog ka pa kaayo, Igsoong Branham.”

Ug miingon ko, “Bueno, malipayon gayud ako.”

8 Ug nagkaaduna pud ko og pribilihiyo nga makaistorya, og makapamatuod sa matag nars niadto nga ospital, ug sa matag doktor usab, bahin sa Ginghamarian sa Dios. Ug dunay usa ka doktor, sa hunahuna ko moanhi man kono siya karong buntaga. Ug ako—akong... nalipay ako nga masayran nga aduna sa gihapon og maayo nga mga kalalaken-an niining kalibutana, tinuod nga mga lalaki, mga kalalaken-an nga nag-eksamin kanako sulod sa lima ka adlaw, usa ka pisikal nga eksaminasyon, nga tingali mokabat og duha o tulo ka gatus ka dolyares ang matag eksaminasyon. Pero sa dihang nahuman na ako, miingon sila, “Amo na lang kanang tabang para sa buluhaton sa Ginoo, nga imong ginabuhat.” Kita n’yo? Oo. Walay bisan... Miingon, “Aba, ikaulaw gyud namo, nga pangutan-on mo pa kami kung aduna ka ba’y balayronon kanamo.” Miingon, “Igo na gayud ang imong mga pag-ampo para kanamo!”

9 “Ug sa sulod,” ingon sila, “aduna kami’y nakaplagan nga usa ka emosyon nga dili namo arang masabtan.” Ug miingon ko... “Among... Kini—kini daw sa dili...” Ingon siya, “Sa imong hitsura, hinoon wala man ka ginerbiyos o kaha may kabalaka. Pero,” miingon, “sa sulod nga bahin, aduna gyu’y emosyon nga dili namo arang masabtan.”

10 Miingon ko, “Kung puede kamong molingkod usa sa makadiyut lang, og sultihan ko kamo.” Ug mao nga naghigot ako mahitungod sa mga panan-awon. Ngani lahi na kadto nga natad sa buluhaton para kanila. Wala sila’y unsa man nga nahibaloan mahitungod niini. Gisultihan ko sila mahitungod sa Biblia. Dayon gisultihan ko sila mahitungod sa panan-awon nga gihatag kanako sa Ginoo niadtong miaging adlaw, ug nanghilak sila nga mora’g mga bata. Nanglingkod na lang didto ug nanaghilak. Ug ako... sila... miingon ko, “Nanghinaut ko nga wala unta kamo naghunahuna kanako ingon nga usa ka relihiyosong buang-buang o unsa man.”

11 Miingon, “Wala gayud, Igsoong Branham. Nagatoo ako niana sa tibuok kong kasingkasing.” Ingon niya, “Apan aduna lang ko’y gustong isulti: Wala baya ka nag-eswkela para tun-an ang ingon-anang mga butang.” Ingon pa, “Mao nga nagatoo

gyud ko nga nagagikan kana sa Dios nga Makagagahum-sa-tanan.” Ug tulo kadto sa dungganong mga doktor sa Louisville, ang mga pinakamaayo nila didto. Ug, busa, nalipay kaayo ko tungod niana, ug ang masayran pud nga tingali’g gitugot kanako sa Ginoo nga makatanum ko og pipila ka Binhi didtong dapita.

¹² Ang matag nars, naistorya ko usab sila. Sila, usa niadto ka buntag, sa paggawas ko gikan sa lawak x-ray-hanan, miingon ko ngadto sa . . . Duna man ko’y nakita nga usa ka luoy’ng tigulang na nga babaye. Nagmasakiton kaayo siya. Ug padayon ra ko nga naglakaw, og naglakaw hangtud nga nakadangat ako kaniya. Naghunahuna gani ko nga basin og himalatyon na siya. Ug miingon ko, “Aduna unta ko’y gustong ipangutana kanimo, igsoong babaye.”

Ingon siya, “Oo, sir.”

Ingon ko, “Usa ka ba ka Cristohanon?”

Ug ingon siya, “Miyembro ako sa *usa* ka iglesia.”

¹³ Ug ingon ko, “Gusto ko lang nga medyo klarohon kana.” Ingon ko, “Ako—gusto kong masayran kung usa ka ba ka Cristohanon, nga tinuod gayud nga Cristohanon. Nga, kung molabang ka na niingon dagat sa kinabuhi, paingon sa pikas bahin nga Yuta, gihigugma mo ba Siya?” Ingon ko, “Maluwas ka ba gayud kaha?”

Ug ingon siya, “Oo, sir. Maluwas ako.”

¹⁴ Ug ingon ko, “Panalanginan sa Dios ang imong kasingkasing kung ingon-niana. Bisan asa man nga direksyon mohuyop ang hangin, nan wala ka’y problema, basta magpabilin ka nga ingon niana.”

¹⁵ Ug kung molibot lamang kita, daghan pa gyud og buutang mga tawo nga nahibilin sa kalibutan.

¹⁶ Bueno, karon, mianhi ako nga dunay usa ka panan-awon nga akong isulti kaninyo pagkataudaud. Ug gusto kong maghisgot, una, mahitungod sa pipila ka Pulong, tungod kay nagatoo ko nga mahinungdanon kaayo ang Pulong, pinaka mahinungdanon gayud. Ug nalipay ko nga makita si Charlie Cox, ug, ang igsoong lalaki, nga akong higala nga anaa dinha, kauban niya. Si Igsoong, dili ko lang madumduman. . . Jeffries, dili ko lang gyud madumduman ang iyang ngalan. Daghan pa kaninyo nga bililhong mga igsoon gikan sa Georgia, gikan sa nagkadayang bahin sa nasud. ang dugay ko nang higala, nga si Bill, nagatoo ko nga, ania sab dinhi, karong buntaga. Ug—ug daghan. . . Ug ang igsoong lalaki dinha nga gikan pud sa Georgia, ang mga igsoon nga naghatag kanako niini nga amerikana. abi ninyo, mao kini’y—mao kini’y usa sa pinaka nindot nga mga amerikana nga akong nasul-ob sukad. Komportable kaayong sul-obon, og nindot gyud kaayo. Ug mahinungdanon kaayo kamo para kanako. Pag sultihan ko na kamo sa kung unsay nahitabo,

kanako, niadtong miaging pipila ka mga adlaw, nan inyong masabtan kon nganong ginahunahuna ko nga mahinungdanon kaayo kini para kanako.

¹⁷ Karon, nagatoo ko, kon itugot sa Ginoo, ginatinguha kong magpadayon sa pakiggubat nga labi pa kaysa kaniadto, sa akong kinabuhi. Tungod kay, akong naamgo karon nga. . . Bueno, mahimo man kong mamatay karon mismo. Mao kana’y, wala n’yo masayri. Hinoon ang akong mga electro-cardiogram ug tanan nang, dise-sais ka nagkalainlaing matang sa pag-x-ray, oo, ang kumpletong pisikal nga eksaminasyon, nagapakita nga ako gayu’y. . . ingon ka normal sama sa kinsa man nga tawo, tawo sa kalibutan. Busa mapasalamaton ako tungod niana. Ug, sa tanang butang, bisan sa tanan niana, ug nagapasalamat ug mapasalamaton sab ako sa Dios, karon, tungod nagatoo ako nga Iya gihapon kong ginapapabilin sa Iyang buluhaton, dili man ingon niana ang Iyang gipakita kanako sa wala pa kadto, kita n’yo, pero nalipay gayud ako tungod niana.

¹⁸ Bueno, sa hunahuna ko, unyang gabii. . . Okey lang ba kanimo? [Nagaingon si Igsoong Neville, “Oo, sir.”—Ed.] Ang atong—atong bilihon nga igsoon usa—usa gyud ka dili maakohon nga tawo, si—si Igsoong Neville. Ug kung aduna man kaninyo ang ania niadtong miaging Dominggo ug nakapatalinghug niadtong maanindot nga mensahe nga iyang giwali, mahitungod sa “tibod sa lana,” kadto mao’y maa- . . . usa sa pinaka maanindot nga mensahe nga akong napatalinghugan sukad-sukad, kadtong giwali ni Igsoong Neville, pinaagi sa Espiritu Santo, niadtong miaging Dominggo, ngadto niining diyutay’ng panon sa mga karnero nga gitapok sa Dios.

¹⁹ Ug kung okey lang, kon makapahimuot sa Ginoo, ug kang Igsoong Neville ug sa iglesia, gusto kong mamulong pag-usab unyang gabii ug magsugod ug usa ka serye sa, siguro, Lunes sa gabii. . . ang buut kong ipasabot, Dominggo sa gabii diay, ug Miyerkules sa gabii, ug sa sunod Dominggo, og usa ka serye mahitungod sa akong gitun-an.

²⁰ Dili ra man unta ko magpabilin didto sa ospital. Pero maayo man kaayo sila kanako, nga gihatag lang nila kanako og usa sa tulo ka bahin ang presyo niadtong lawak. Ug busa ako na lang gidala ang akong mga Biblia, ang akong mga basahon, ug giplastar ang higdaanan, ug nagpahimutang didto nga komportable gayud, ug gibutang ko sa palibot ang tanan kong mga Biblia ug uban pang butang. Ug nagkaaduna gyud ko og maanindot nga higayon, hangtud nga gidala nila kadtong castor oil. Nahunong gud dayon ang maanindot kong higayon. Ako—impas gyud ko niadtong tungora. Tungod, Igsoong Pat, kasukaon man gud ko og ayo. Dili gyud nako maagwanta, kadto. Ug, bisan pa man nagkaaduna ako og maanindot nga higayon, sulod sa unang tulo o upat ka adlaw. Nagkaaduna gihapon ako og maanindot nga higayon.

21 Ug akong gitun-an ang bahin sa Basahon sa Mga Taga-Efeso. Oh, ang bahin sa paghan-ay sa Iglesia! Ug nahunahuna ko nga usa gyud kini ka maanindot nga butang.

22 Ug—ug kung kamo, karon, kung aduna man kamo'y simbahan nga inyong ginatambongan, nan padayon lang mo ug magpabilin sa inyong katungdanan. Apan kung wala pa kamo'y simbahan, ug buut n'yong mobalik unyang gabii, ug sa Miyerkules sa gabii, ug sa Dominggo sa gabii, gusto kong hisgotan, unyang gabii, ang unang Basahon sa Mga Taga-Efeso, ug sa Miyerkules sa gabii, ang ika-2 na pud nga kapitulo sa Mga Taga-Efeso, ug pagkasunod Dominggo, ang ika-3 na sab nga kapitulo sa Mga Taga-Efeso, aron ipahimutang ang Iglesia sa kahan-ayan. Kabalo na mo kung unsay buut kong ipasabot, Kini—paghan-ay Kini, sumala sa pagkapuwesto. Ug nahunahuna ko nga pagpalig-on sab kini, alang sa Iglesia.

23 Wala ako. . . ako'y—nagahisgot ko niini para lang sa mga tumatambong sa Branham Tabernacle.

24 Ug kung aduna man kaninyo nga minahal nga mga igsoon. . . nasayod ko nga ang pipila kaninyo, sa hunahuna ko, aduna usab og mga panagtigum. Ngani ang atong igsoon didto sa Sellersburg, ug—ug ang uban pa, nagapahigayon pud og mga panagtigum. Bueno, ania, kana'y rebaybal pud nga mga panagtigum. Mao nga panambong gihapon mo niana. Sila'y mga alagad usab ni Cristo, mga batan-ong kalalaken-an nga mibarug, og nanggawas. Sa diha nga gisalikway sa kaugalingon nilang iglesia ang Kamatuoran, ug mga ingon nianang butang, nanggawas sila mismo gikan didto. Ug gitawag sila sa Dios para sa ministerio. Oo, sir. Ako—akong ginadayeg ang usa ka lalaki. . . dili ko lang madumduman ang ngalan sa maong lalaki. Pero siya'y usa ka batan-on pa nga lalaki, buutan, nga guwapong lalaki, ug dunay buutan nga asawa ug mga anak.

25 Ug—ug si Igsoong Junie Jackson sab nagapahigayon siya og pipila ka mga panagtigum dinhing dapita, nga usa usab ka maanindot, og talagsaon nga tropeyo sa makahibulongang grasya sa Dios. Ug sa diha nga magpahigayon gani sila og mga rebaybal sa inyong mga simbahan, panambong mo sa mga ingon niana, tungod kay mao kana'y inyong. . . mao kana ang angay n'yong buhaton. Tungod kay, wala mo kabalo, tingali'g dunay usa ka makasasala nga moduol sa altar, ug tingali'g kamo ang makapaaghat nga maagak kana nga tawo paingon kang Cristo, nga mamahimo n'yong dakung ganti pag didto na mo sa pikas nga bahin.

26 Kini'y pagtudlo lamang ug pagpahimutang sa Iglesia sa kahan-ayan, dinhi sa tabernakulo, nga makatabang gayud samtang nagapadayon kita.

27 Karon, wala baya nako nadala ang akong relo, mao nga aduna gyu'y motan-aw sa oras para kanako. Gipakita na ni Doc

sa akona, nga duna siya'y relo, busa, igsoon ko. Busa karon. . . [Nagaingon si Igsoong Edgar "Doc" Branham, "Dili man ta ka pabayron og daku para niini," ug gitunol ang iyang relo ngadto kang Igsoong Branham—Ed.] Dili man kaha ko nimo pabayron og daku para niini? Sige. Bueno, karon, maayo kana. Bueno, karon, sa hunahuna ko mora'g dili man husto ang maong butang, sa sugod pa lang. Busa. . . ["Salamat. Aduna ko'y usa nga isulti kanimo."] Bueno, oh, oh, sh, sh, sh, sh. ["Aduna ko'y diyes sentimos nga gigahin, karong buntaga, sa akong adlaw'ng-natawhan, para moarang-arang ang imong paminaw."] Mao ba? Bueno, kana'y. . . Mas maayo pa ang pagtuyok niini nga relo, Doc. Ingon niya aduna kono siya'y gigahin nga diyes sentimos, sa iyang adlaw'ng-natawhan, para moarang-arang kono ang akong paminaw, tungod kay duha o tulo ka tuig man ang agwat tali kaniya ug kanako. Ug mao nga makita ninyo kon asa na ako, sa dalanon. Apan, oh, wala kana'y sapayan bisan gamay, para kanako. Bueno, dili ako mamulong og dugay.

²⁸ Karon, kung duna ma'y mga bag-ohan sa atong mga pultahan, ginaabi-abi gyud namo kamo sa tibuok namong kasingkasing. Ginadapit gayud namo kamo dinhi niining gamay'ng tabernakulo. Dili kaayo ingon ka daku ang among bilding. Pero sa karon amo nang giplanohan nga magpatukod, og dili ingon ka daku nga bilding, pero basta usa ka. . . Medyo gubaon na man gud kini. Ug mao nga paningkamotan namo nga makapatukod unta og usa ka maayo-ayo og medyo komportable na nga simbahan dinhi, sa dihadaha nga among. . . kon itugot na sa Ginoo kanamo nga buhaton kana. Ug gani daghan man kaninyo ang nagapaningkamot para niini, ug ginapasalamatan gayud namo kana.

²⁹ Karon gusto kong mopakli kamo uban kanako, niining buntaga, sa pagbasa, sa Unang Samuel sa ika-8 nga kapitulo, ug magsugod sa, sugdan nato sa ika-19 nga bersekulo, sa ika-19 ug ika-20 nga bersekulo, siguro, para sa kahulogan sa usa ka hamubong teksto.

³⁰ Ug karon, samtang inyo kining ginapangita, ug sa dili pa kita. . . Basahon sa nato kini, ug pagkahuman mag-ampo kita. Ug aduna ba'y unsa man nga mga hangyo karong buntaga, ug moingon lang, "Hinumdumi ako"? Sa ulahi natong panagtigum, duha, o tulo na ka semana ang milabay, niadtong nagpahigayon ako og panagtigum. . . Ingon ta, nga atong. . .

³¹ Lain pa'y ako, samtang nagapakli kamo, aduna diay panagtigum sa Chautauqua, nga pagasugdan sa ika-6. Nagalaum sab kita og usa ka halangdon nga higayon, didto sa Middletown, Ohio. Mao nga kaninyo nga dunay taliabot nga mga pagbakasyon, panambong mo. Ug didto kana sa dakung kampo, sa may suba mismo, kon diin, oh, atong. . . madungog n'yo gayud ang tanang pagpangwali sukad-sukad. Ngadto-nganhi silang tanan nga mga magwawali, sa maong suba, kada

buntag, sa tibuok adlaw ug gabii. Ug nagakatigum silang tanan didto. Usa kadto ka dakung kampo, pipila ka pilo, ang gidak-on kaysa sa Silver Hills. Ug—ug aduna sàb og dakung lugar didto kon diin mahimo natong mapalingkod ang walo hangtud napulo ka libo nga mga tawo. Ug pirmi kadtong mapuno. Ngani aduna kami og maanindot gayud nga kahigayonan didto sa Ohio.

³² Ug ang tigulang na nga si Igsoong lalaking Kidd, nga akong giadtoan og giampo, niadtong miaging buntag. Nahinumduman n'yo ba nga giestorya ko kaninyo, tulo ka semana na ang milabay? Nga gitagalan na siya sa doktor og baynte-kuwatro ka oras na lang, nga mabuhi. Pero ania na siya nga makatindog ug makalakaw na. Duna siya'y gikutlo nga Kasulatan, usa ka awit nga dili niya makanta. Ug sa pagsulod ko didto ug nakita siya, niadtong miaging buntag, ug dunay gamay'ng panyolon diha kaniya. Ngani migikan ako dinhi mga tulo o upat ka oras sa wala pa nagbanagbanag, aron ako gyud siyang maabtan. Ingon nila nga mamatay na kono siya niadtong adlawa; tungod sa kanser sa prostate.

³³ Ug ang iyang minahal, matahum, og tigulang na nga asawa, naga-labandera pa kaniadto sa kantidad lang nga singkuenta sentimos matag adlaw; gikan sa dili pa magbanagbanag, hangtud pa mogabii na, sa kantidad nga singkuenta sentimos, aron lang padayon nga makaadto ang iyang bana sa natad sa pagpangmisyon ingon nga usa ka magwawali. Nagawali siya sulod sa duha ka semana nga rebaybal, ug mokuha og offering, makakuha og otsenta sentimos.

³⁴ Apan nakita ko sila nga atua didto niadtong miaging buntag, silang duha, nga tigulang nga magtiayon, usa ka matahum nga magtiayon, diay, nga atua didto, ug anaa pa ang gamay niyang panyolon sa iyang abaga. Ug may usa sa iyang mga nakabig, nga nubenta'y-dos anyos na ang pauigon, pero ingon pa gyud ka piskay ug mahimsog, ug Pentecostal gayud sa kinasuloran, ug nga atua pud didto, kabalo mo. Ug miingon ko, “Kabalo ba mo kung para sa unsa nga ania pa kamong tigulang na nga mga kaigsoonan? Nagahulat na lang mo nga moabot ang sakayan.” Mao lang kana. Ang ilang buluhaton, nabuhat na man nila tanan, ang—ang katuyoan usab nabuhat na nila, ug mao nga andam na sila karon nga motaliwan para sa ilang ganti.

³⁵ Ug miingon ko kang Igsoong Chev, kang Igsoong Kidson . . . Kidd, niadto nga buntag, “Moadto baya gyud ka sa panagtigum sa Chautauqua.”

³⁶ Iya akong gitawgan kagahapon, og miingon, “Ako'y . . . Moadto ako, Igsoong Branham.” Maayo gayud.

³⁷ Daghan pa sa mga panagtigum, sa bag-o kong ministerio nga nagasugod na. Ngani dunay usa ka igsoon, igsoong Baptist nga ania mismo dinhi, ang iyang anak nga babayeng, dalaga, medyo nahisalaag man gud. Ug gisultihan ko siya, “Ginahatag

ko kanimo ang imong anak nga babaye alang ni Ginoong Jesus,” niadtong miaging buntag. Ug sa dihang miuli na siya, naluwas gayud ang maong dalaga. Ug ang usa pa ania karong buntaga, nga magpabautismo na ug magpadayon.

³⁸ Ug may usa pud ka lalaki, si Mr. Sothmann, nga usa ka higala nako nga taga Canada, ang iyang ugangang-babaye naghimalatyon na kaniadto, ingon ko, “Makaplagaan mo ang imong ugangang-babaye inig abot mo didto, bueno, nga paingon na siya nga maayo, oo.” Mao gayud ang nahitabo. Ug basta . . . nagapanambong gayud ang mga tawo. Ngani nagasugod pa lamang kini sa karon, og nagalambo pa. Apan, oh, nagalaum kita sa labing, madagayaon gayud sa tanang butang. Ania na kita sa dautan ug kaulahiing mga adlaw, apan sa mahimayaong takna gayud.

³⁹ Karon naandam n’yo na ba ang inyong Biblia, para sa pagbasa, sa ika-8 nga kapitulo sa Samuel? Ug ako nang gisabot si Gene nga magpabilin ùsa siya dinha sa luyo, aron i-rekord ang tibuok bahin niini. Gasugod pa lang kita, sa atong panagtigum.

Apan ang katawohan nagdumili sa pagpamati sa tingog ni Samuel; ug sila miingon, Dili; apan magabaton kami og usa ka hari sa ibabaw namo;

Aron kami usab . . . mahisama . . . sa nasud, sa tanang nasud; ug nga ang among hari magahukom kanamo, ug magauna kanamo, ug moaway sa among mga gubat.

. . . si Samuel nakadungog sa tanan niining mga pulong sa katawohan, ug . . . siya nagsugilon niini pag-usab sa mga igdulungog sa GINOO.

Ug ang GINOO miingon kang Samuel, Pamatia ang ilang tingog, ug buhati sila og usa ka hari. Ug si Samuel miingon sa mga tawo sa Israel, Lakaw kamong tagsa-tagsa ka tawo ngadto sa iyang siyudad.

⁴⁰ Karon kung mopili man ako gikan niini, karong buntaga, nga pagatawgon kong usa ka teksto, para sa mosunod nga pipila ka minuto, gusto kong pilion ang teksto nga: *Ang Sinalikway Nga Hari*.

⁴¹ Panahon kini kaniadto, sama sa tanang mga panahon, nga ayaw gayud sa mga tawo nga pangunahan sila sa Dios. Gusto man gud nila ang kaugalingon nilang pamaagi sa pagpanguna. Ug kini nga estorya karong buntaga . . . Ug pag-uli ninyo sa inyong panimalay, maayo gyud kon basahon n’yo kini hangtud sa katapusan. Panahon kini kaniadto sa—sa mga adlaw ni Samuel, ang tawo sa Dios, ang propeta. Ug usa siya ka matarung nga tawo, ug maayo nga tawo, halangdon, dungganon, tinuod ug matinuuron sa mga tawo, wala niya sila ginalimbongan, ug walay unsa man nga ginasulti kanila kondili ang tukma gayud nga MAO KINI ANG GINAINGON SA GINOO.

42 Apan miabot ang mga tawo sa punto nga gusto na nilang usabon ang ingon-ini nga programa. Nakita man gud nila ang mga Filistihanon, ug ang mga Amalekanhon, Amorehanon, mga Hetehanon, ug ang uban pa nga mga nasud sa kalibutan, ug ilang nakita nga kadto sila adunay mga hari nga nagapangulo kanila, ug nagamando kanila, ug nagapanguna kanila, ug nagapakig-away sa ilang mga gubat, ug uban pa. Ug mora'g ingon-niini ang gitinguha kaniadto sa Israel nga mag-awat-awat sila mismo nga sama niadtong mga hari, ug sama niadto nga mga katawohan.

43 Apan sukad-sukad, sa unsa man nga kapanahonan, ang katuyoan sa Dios alang sa Iyang katawohan dili gayud ang manglihok nga sama sa mga tawo sa kalibutan, o madumalahan o makontrolar nga sama sa mga tawo sa kalibutan. Kondili ang mga tawo sa Dios, sa kanunay, usa—usa gyud ka talagsaon nga katawohan, usa ka lahi nga klase sa katawohan, usa ka tinawag-pagawas, usa ka linain, ug bug-os gayud nga lahi ang ilang pagpanglihok, ang ilang mga pamaagi, ang ilang paagi sa pagkinabuhi, kumpara sa mga tawo sa kalibutan. Ang ilang tinguha sa mga butang, ug ang tibuok nilang kinaiyahan, kanunay gayud nga sukwahi sa mga butang nga ginatinguha sa mga tawo sa kalibutan.

44 Ug ang katawohan sa Israel miadto kang Samuel ug miingon, “Karon, nagakatigulang na ka, ug ang imong mga anak nga lalaki wala managlakaw sa imong dalan.” Tungod kay, dili man sila matinud-anon nga sama ni Samuel. Sila'y manghiphip ug ginakuwartahan ang mga tawo. Ug miingon ang mga tawo, “Samuel, ang imong mga anak nga lalaki dili man susama nimo, mao nga gusto namong moadto ka ug mangita ug usa ka hari para kanamo, ug dihogi siya, ug himoa kami nga katawohan nga sama sa tanang uban pa nga katawohan sa kalibutan.”

45 Ug gipaningkamotan gyud ni Samuel nga sultihan sila nga dili kadto magsilbi. Ingon siya, “Kung buhaton n'yo kana, mahibaloan n'yo na lang, og makaplagaan n'yo nga ipatawag niya ang inyong mga anak nga lalaki gikan sa inyong panimalay, aron himoon sila nga mga sundalo, aron maoy magpadagan sa iyang karwahe, ug padalhon og mga hinagiban ug mga bangkaw. Dili lamang kana, kondili ipatawag sab niya ang inyong mga anak nga babaye, aron himoong mga magbubuhat og tinapay, ug kuhaon sila gikan kaninyo, aron magpakaon sa mga kasundalohan. Ug,” ingon pa, “gawas pa niana, mangolekta pa gyud siya kaninyo og mga buhis, gikan sa inyong mga ani, ug sa tanan ninyong kinitaan. Mangolekta siya og buhis sa tanan niana, aron mabayaran ang pipila ka utang sa gobyerno, ug uban pa, nga kinahanglang bayaran.” Ingon si Samuel, “Sa hunahuna ko kamong, tanan, sayup gayud.” Apan sa dihang . . .

46 Miingon ang mga tawo, “Apan gusto gyud namo sa gihapon nga mamahimong sama sa tanang uban pa nga mga tawo.” Aduna gyu'y butang bahin sa mga kalalaken-an ug mga

kababayen-an, nga nagatinguha sila nga mamahimong sama sa usa'g usa. Ug adunay usa lamang ka tawo nga nagpuyo ibabaw sa yuta kaniadto nga mao'y atong ehemplo, ug kana mao ang Usa nga namatay para kanatong tanan, ang atong Ginoo ug Manluluwas, nga si Jesus Cristo. Siya mao ang atong hingpit nga ehemplo sa kung unsa unta kita, nga kanunay'ng nagapamuhat sa buluhaton sa Amahan, ug ginabuhat kung unsa ang husto.

⁴⁷ Ug bisan unsa pa ang pagpaningkamot ni Samuel nga aghaton ang mga tawo, pero padayon gihapon silang nagaadto kaniya, adlaw ug gabii, "Gusto namo og usa ka hari. Gusto namo og usa ka tawo. Gusto namo og usa ka tawo nga masulti namo nga, "Kini mao ang magauga kanamo."

⁴⁸ Ug dili gyud sukad ingon niana ang kabubut-on sa Dios. Dili gayud ingon-niana ang kabubut-on sa Dios kaniadto pa, o dili gayud mamahimong kabubut-on sa Dios sa umalabot, nga ang usa ka tawo mangulo sa usa pa. Ang Dios man ang nagapangulo sa tawo. Ang Dios mao ang atong Tigpangulo, ang atong Hari.

⁴⁹ Ug usa gayud, ka dakung peligro sa karong panahon, tungod kay ang tawo daw sa aduna man nianang mao gihapon nga panghunahuna. Daw sa wala nila mahisabti nga ang Dios gyud sa gihapon ang nagapangulo sa tawo, dili nga tawo ang nagapangulo sa tawo.

⁵⁰ Busa nagpili sila mismo og usa ka tawo kaniadto nga ginganla'g Saul, nga anak ni Kish. Ug usa siya ka dungganon nga tawo, usa ka halangdon nga tawo. Mao nga naangayan gayud siya sa mga tawo, tungod kay daku man siya, taas, ambongan, og bantayog gyud sa usa ka lalaki. Ngani miingon ang Kasulatan nga siya mao ang pinakalabaw sa kinsa man nga lalaki sa Israel. Pang-hari ang iyang hitsura, ug guwapo gayud ang iyang nawong. Siya'y utokan usab ug talagsaon nga tawo.

⁵¹ Bueno, ingon-ana man sab nga matang sa tawo ang gustong pilion sa mga tawo sa karong panahon. Ang mga tawo daw sa wala na sila nangalipay sa paagi sa pagpahimutang sa Dios sa Iyang Iglesia, nga minandoan ug kontrolado sa Balaang Espiritu. Gusto nila og usa ka tawo, usa ka lalaki, usa ka denominasyon, og pipila ka mga tawo nga mao'y modumala sa Iglesia. Mao gani nga, dili na nila bug-os mahitugyan ang ilang mga kaugalingon ngadto sa kamot sa Dios, aron unta mamahimong espirituhanon, og aron mapangunahan sa Espiritu Santo. Gusto man gud nila og usa ka tawo nga mao'y maghimo og relihiyon para kanila, usa ka tawo nga mosulti kanila kung unsaon kana pagbuhat, ug tanan na mahitungod niana.

⁵² Busa kadto nga tawo daw sa angayan gayud kono para sa maong puwesto, tungod kay usa man siya kono ka intelektuwal kaayo nga tawo.

⁵³ Ug pareho ra gayud sa karong panahon. Gusto natong mopili og ingon niana nga mga tawo, usab, para mokontrolar sa atong

kaiglesiahan, para mokontrolar sa Iglesia sa Dios. Wala ko’y unsa man nga isulti batok niana, apan buut ko lang nga mohimo og usa ka punto, nga: dili gayud sa karon, dili usab kaniadto, ug dili gayud sa umalabot nga mamahimong kabubut-on sa Dios, ang ingon niana. Ang Dios man ang angay’ng mangulo sa Iyang katawohan, ang angay’ng mangulo sa matag indibiduwal.

⁵⁴ Bueno nahibaloan nato nga kining anak ni Kish, halangdon nga lalaki, ug—ug ang iyang bantayog, ug ang iyang. . . Daw sa naangayan gyud siya sa mga tawo, mao nga bagay gyud kono kaniya ang kupo nga iyang pagasul-obon. Ug ang korona diha sa iyang ulo, nga lagpas sa tanang mga tawo, nga samtang nagalakaw siya, siya’y mamahimong usa—usa ka maipasigarbo gayud sa gingharian sa Israel. Kay, ang uban pa nga mga hari, sa ubang kanasuran, maghunahuna man kono, “Tan-awa n’yo kung unsa ka halangdon kana nga tawo!” Daw sa unsa nga ipunting kono sa maong mga tawo ang ilang tudlo ug moingon, “Tan-awa n’yo kini, grabe ka halangdon ang among hari! Tan-awa n’yo kung unsa ka halangdong tawo ang nagapangulo kanamo!”

⁵⁵ Ug subo man nga isulti, apan tinuod gayud kini sa iglesia sa karong panahon, nga ganahan kaayo silang moingon, “Ang among pastor usa ka tawo nga dili mabaw og panghunahuna. Usa siya ka halangdon nga tawo. Migraduwar siya sa Hartford,” o sa kung unsa man nga bantugang eskwelahan sa teolohiya. “Aduna siya’y upat ka digri gikan sa *ingon niani-ug-ingon niana* nga tulonghaan. Ug maayo pud kaayo siyang makigkuyog sa mga tawo.” Hinoon okey man kana tanan, ug dunay kapuslanan. Apan ang paagi sa Dios alang sa Iyang Iglesia mao man ang mapangunahan sa Espiritu Santo, ug sa Iyang Espiritu.

⁵⁶ Pero gusto man nilang moingon nga, “Aduna kami og dakung denominasyon nga among gipasakopan. Ngani kaniadtong mga adlaw nga nagsugod kami, diyutay pa lang kami, pipila pa lang ang mga miyembro, ug gamay ra. Pero karon midaghan na kami hangtud sa punto nga usa na kami sa pinakadagkung mga denominasyon. Aduna kami og pinakamaayo nga mga tulonghaan, ug pinaka-edukado nga mga ministro. Ania pud kanamo ang pinakamaanindot og binistihan nga mga miyembro. Ug ang pinaka-intelektuwal nga mga tawo sa siyudad nagatambong sab sa among denominasyon. Ug nagahatag pa gyud kami sa mga organisasyon nga nagapanghatag og tabang. Ug nagabuhat sab kami og maayong mga buhat, ug tanan nang ingon-niana.” Ug dili gayud, dili unta itugot sa Dios, nga makasulti ako og usa ka pulong batok niana, tungod kay maayo man kana tanan.

⁵⁷ Apan, sa gihapon, dili man kabubut-on sa Dios nga ang usa ka tawo mangulo sa usa ka tawo. Gipadala gani sa Dios, niadtong Adlaw sa Pentecostes, ang Espiritu Santo aron mangulo sa kasingkasing sa mga tawo, ug mangulo sa ilang

kinabuhi. Mao nga dili gyud Niya tuyo nga ang tawo mao'y mangulo sa tawo.

58 Pero ganahan kaayo tâng mosulti niana. Mahinungdanon man gud kaayo nga butang pag masulti nato nga miyembro kita sa ingon ka dakung organisasyon.

59 “Usa ka ba ka Cristohanon?” Sa ingon-niana ako nahidangat niini nga teksto, niadtong atua ako sa ospital. Ug kon aduna gani ko'y pangutan-on, “Usa ka ba ka Cristohanon?”

“Miyembro ako sa *ingon niini-ug-ingon niana.*”

“Usa ka ba ka Cristohanon?”

“Miyembro ako sa *ingon niini-ug-ingon niana.*”

60 Ug may usa ka nars ang miduol ngadto sa kilid sa higdaanan, kon diin ako nagabasa sa Biblia, ug usa siya—usa siya ka bag-o nga nars niadto nga lawak. Ug ingon siya, “Kumusta ka.” Ingon siya, “Nagatoo ko nga ikaw si Rev. Branham, nga ania para sa usa ka pisikal nga eksaminasyon.”

Ingon ko, “Oo.”

61 Ug ingon siya, “Mahimo ko bang haplasan ang imong likod, aron medyo moarang-arang ang imong paminaw gamit ang alcohol?”

Ug ingon ko, “Puede.”

62 Ug samtang ginahaplasan niya ang akong likod, miingon siya, “Miyembro ka sa unsa man nga iglesiang denominasyon?”

63 Ug ingon ko, “Oh, miyembro ako sa pinaka-karaan na nga denominasyon.”

Ug ingon siya, “Unsa man kana nga denominasyon?”

64 Ingon ko, “Kini mao kadtong naorganisa sa wala pa naporma ang kalibutan.”

65 Ug, “Oh,” ingon siya, “unsa? Sa hunahuna ko mora'g wala gyud ko kahibalo niana.” Ingon pa siya, “Miyembro man ko sa *usa* ka iglesia. Mao ba kana nga organisasyon?”

66 Ingon ko, “Dili, ma'am. Mga duha ka gatus ka tuig pa lang man, kanang imong organisasyon. Apan kini nga organisasyon nagsugod na kaniadtong nagakadungan pag-awit ang mga bitoon sa kabuntagon, ug ang mga anak sa Dios nagkaduyog sa pagsinggit sa kalipay, sa dihang nakita nila ang pag-abot sa usa ka Manluluwas nga magatubos sa tawo.”

67 Ug mihunong sa siya sa paghaplas sa akong likod. Ug medyo mitikubo ako, nga nakaingon *niini*, aron nga mahaplas ako niadtong maong babaye. Ug taga dinhi gani siya duol sa Corydon, dinhi ra dapit. Nagka-istoryahanay kami. Ug miingon siya, “Sir, nagatoo gyud ako sa una pa nga kung Dios ang Dios kaniadto, nan Siya'y Dios gihapon, hangtud karon, sama lang sa kung unsa Siya kaniadto nga mga adlaw.” Ingon siya, “Bisan

pa nga dayag kaayo nga ginapanghimakak kana sa akong iglesia, pero nagatoo gayud ako nga mao kana ang Kamatuoran.”

⁶⁸ Ug miingon ko, “Dili ra ka halayo sa Gingharian sa Dios, batan-ong babaye.”

Ingon siya, “Kung Siya ma’y usa ka mananambal kaniadto, dili ba mananambal man gihapon Siya hangtud karon?”

Ingon ko, “Siya’y mananambal gayud, igsoon ko.”

⁶⁹ Apan gusto man sa tawo nga mangulo, ug mangulo sa tawo. Ug gusto sab sa tawo nga tawo ang mangulo kaniya. Ayaw niya nga ang Dios ang mangulo.

⁷⁰ Busa kining anak ni Kish, nga ginganla’g, Saul, mao gayu’y katubagan sa ilang ginatinguha, nga usa ka halangdong pang-hari nga alaki. Ug ang... Oh, mahimo gayud niya nga pangunahan sila sa ilang mga gubat, ug uban pa. Apan, bisan pa niana, dili man kadto ang pamaagi sa Dios sa pagbuhat og mga butang. Ang gusto gyud sa Dios nga ang Iyang maunongong tigulang nga propeta ang manguna kanila, ug manulti sa Iyang mga Pulong ngadto kanila.

⁷¹ Sa karon, niining panahon, sa bantugang kapanahonan sa iglesia nga atong gikinabuhian, kita, nagahunahuna ako, ug nagatoo niini sa tibuok kong kasingkasing, nga kita’y bug-os na nga nangabalit-ad sa kung unsa unta ang gisugo sa Dios nga atong pagabuhaton. Ngani ang ulahing mga Pulong sa atong Manluluwas anaa sa Marcos 16. Ang ingon:

Panglakaw kamo sa tibuok kalibutan, ug iwali ang maayong balita sa tanang binuhat.

Ang nagatoo ug nabautismohan maluwas; . . . ang dili nagatoo pagahukman sa silot.

Ug kini nga mga ilhanan maganunot kanila nga nagatoo; Sa akong ngalan pagahinginlan nila ang mga yawa; magasulti sila’g usa ka bag-ong sinultihan;

Ug kung makakupot sila og mga bitin; o . . . makainom . . . sila’g butang nga makahilo, dili kini makadaut kanila; ug kung ilang . . . pagapandongan sa ilang mga kamot ang mga masakiton, . . . mangaayo sila.

⁷² Wala gayu’y tawo, walay anak ni Kish, o wala na’y si bisan kinsa pa, ang makahimo niana gawas sa pagpanguna sa Balaang Espiritu. Apan nanagtukod hinoon kita og mga eskwelahan, nanagtukod kita og mga seminario, ug nanagtukod og mga organisasyon, aron—aron malipay, ug mahimong sama sa tanang uban pa sa kalibutan.

⁷³ Bueno, ang Balaang Espiritu man ang Tigpanguna niini nga nasud kaniadto. Gipangulohan kini nga nasud kaniadto sa dihang . . . kaniadtong gisulat nila ang pagpahayag sa

kagawasan. Ug adunay usa pa ka lingkoranan didto nga walay naglingkod. Wala gayu'y bisan gamay nga pagduhaduha sa akong hunahuna nga ang Anak sa Dios ang naglingkod niadto nga lamesa, sa dihang gitukod kini nga nasud kaniadto sumala sa mga prinsipyo nga may kagawasan sa relihiyon ug kagawasan para sa tanan, ug sumala sa Eternal nga Pulong sa Dios.

⁷⁴ Apan ato na man kanang gihugawan. Tungod sa pulitika; nagpili kita og mga kalalaken-an dinha, pinaagi og pagpamalit ug pamaligya, ug sa bakak nga mga saad. Hangtud nga . . . Ang atong nasud, ug ang atong pulitika, ug ang atong demokrasya, hugaw na kaayo hangtud nga kini'y—nasagolan na kini og komunismo ug tanan nang matang sa mga ismo.

⁷⁵ Ug sa makadaghang higayon nagapanawagan pa kita og mga panagtigum para sa pag-ampo, sa diha nga magpulong-pulong ang mga kanasuran, ug dunay . . . o kung adunay mga pagahisgotan. Pero niadtong usa ka, dakung kahigayonan, bag-ohay pa lang, wala man lang panawagan ni usa ka higayon para sa pag-ampo. Unsaon man nato sa pagsulbad ang mga panagkalahi kon walay pag-ampo? Unsaon man nato sa pagsalig, nga ang tibuok kalibutan, makahimo og unsa mang butang kon wala ang pagpanguna sa Balaang Espiritu?

⁷⁶ Apan isulti ko kini nga may paghigugma ug pagtahud sa atong nasud ug sa bandera niini, ug sa republika nga ginarepresentar niini: Gisalikway na nato ang atong Tigpangulo, ang Balaang Espiritu, ug tungod sa mahugaw nga pulitika nagpili kita og mga kalalaken-an nga balit-ad og panghunahuna. Ug kung dili kamo magbantay, makahimo gayud sila og usa sa pinaka-makuyaw nga mga sayup nga ilang mahimo, bisan sa karon, tungod kay nagatinguha man ang mga tawo nga mga tawo ra usab ang mao'y mangulo.

⁷⁷ Ang gikinahanglan nato sa kaulohan niining Estados Unidos, sa usa ka presidente, ang gikinahanglan nato sa Kongreso, ang gikinahanglan nato sa atong mga husgado, mao ang mga kalalaken-an nga nagpahinungod sa ilang kinabuhi ngadto sa Dios, ug nga puno sa Espiritu Santo, ug napangunahan sa Iyang Balaanong pagpanguna. Apan, imbis nga ingon-niana, nagapili hinoon kita og mga tawong intelektuwal, mga tawong adunay “dagway sa pagkadiosnon, pero ginapanghimakak ang gahum sa Dios,” mga tawong ateista, ug usahay mas grabe pa gani kaysa niana, ang atong ginapili diha sa natad sa pulitika, sa atong nasud.

⁷⁸ Dili lamang dinha, kondili sa atong mga kaiglesiahan usab. Ang atong mga kaiglesiahan nahimo nang mahugaw tungod sa basihanang nga kita, sa pagpili nato og atong mga magbalantay nga manguna kanato, nangadto hinoon kita sa mga seminaryo ug nagpili kita og mga kalalaken-an nga bantugan og hilabihan ka intelektuwal, mga kalalaken-an nga utokan kaayo

og panghunahuna, mga kalalaken-an nga makinaadmanon, ug maayo kaayong makiuyon-uyon sa mga tawo, ug mga bantugang kalalaken-an sa katilingban, nga wala ko'y unsa man nga ikasulti batok niana. Mga kalalaken-an nga buutan diha sa ilang mga pagkinabuhi, mainampingon sa ilang mga pamaagi, ug kung ginaunsa nila sa paggawi taliwala sa ubang mga kalalaken-an, ug taliwala sa mga katawohan, mga bantugang kalalaken-an diha sa ilang natad sa pagpangmisyon, nga wala sab ko'y masulti nga dautan bahin niana. Dili unta itugot sa Dios nga mamahimong ingon ka dautan ang akong espiritu. Apan, sa gihapon, dili man ingon niana ang gipili sa Dios para kanato.

⁷⁹ Kondili ang pagpanguna gayud sa Balaang Espiritu: si Cristo nga anaa sa kinasuloran sa kasingkasing sa mga tawo. Daghan man gud kanilang intelektuwal nga mga kalalaken-an nga nagabarug sa atong pulpito ginapanghimakak nga tinuod aduna gayu'y Espiritu Santo. Daghan kanila ang nagapanghimakak nga adunay Balaanong pagpang-ayo ug Gahum sa Espiritu.

⁸⁰ Ngani duna ko'y gibasa nga artikulo, kagahapon, nagtoo ko nga mao kadto, usa ka koleksyon sa mga balita nga gigunting gikan sa mantalaan mahitungod kang Jack Coe, ang mitaliwan na nga si Jack Coe, ang. . .usa sa akong mga nakabig ngadto kang Ginoong Jesus, nga usa usab ka gamhanang tawo sa kaisog, sa iyang adlaw kaniadto. Ug gipatawag siya aron imbestigahon, didto sa Florida, tungod sa paghangyo niya sa usa ka bata nga tangtangan ang aparato nga pangsuporta sa mga bitiis niini, ug gipalakaw kini sa entablado. Ug sa pagbuhat niadto, nakalakaw sa entablado ang maong bata, nga normal na gyud, ug natumba ra sa dihang nakaabot na kini sa iyang inahan. Pero tungod ra kadto tanan sa plano sa kaaway ni Cristo, og gidala niining batan-ong inahang babaye ug sa iyang bana ang atong maisogon nga igsoon ngadto sa korte niadtong lugara.

⁸¹ Ug sa higayon nga angay'ng misuporta unta kang Igsoong Jack ang matag iglesia, sa higayon nga ang matag lalaki sa iglesia nga nagapahayag sa Ngalan ni Jesus Cristo angay nga misuporta unta kaniya, nga may kaisog, og ang matag lalaki nga nagatawag sa Ngalan ni Ginoong Jesus angay nga nangluhod unta sila diha sa pag-ampo, apan, imbis nga ingon niana, dinha sa ulohan sa mga mantalaan, usa hinoon sa atong dagkung mga denominasyon ang miingon nga nakighiusa kono sila sa mga ateista, para kondenahon, og para ipabilanggo si Igsoong Jack Coe. Mahunahuna n'yo ba ang usa ka iglesia, nga nagatawag pa mismo sa Ngalan ni Cristo, unya makighiusa sa usa ka ateista, aron kondenahon ang usa ka diosnon nga tawo nga gapaningkamot ra unta sa tibuok niyang kasingkasing nga mobarug alang sa Biblia? Pero mao gyud kadto ang ilang gibuhat.

Ug niadtong higayona mitabang man si Igsoong Gordon Lindsay.

⁸² Ug sa dihang miingon kadtong dili-magtotoo nga huwes, “Kini nga tawo usa ka manglilimbong tungod kay gipatangtang man niya ang aparato nga pangsuporta niana nga bata ug gipalakaw pa gyud sa entablado, ug miingon nga ‘naayo’ na kono ang bata. Pero namakak siya, ug mibuhat siya og butang nga supak sa mga sugo sa doktor, busa aduna siya’y kaso sa pagpanglimbong.”

⁸³ Ug mitindog si Mr. Coe, ug miingon siya, “Sir, supak ako niana nga pahayag. Giayo na man gud sa Dios ang maong bata.”

⁸⁴ Ug miingon ang huwes, “Pangutan-on ko ang si kinsa man dinhi niini nga korte kung tinuod ba gyud kana nga pahayag, nga mahimong ayohon sa Dios kanang batang lalaki diha sa usa ka bahin sa entablado, ug unya pabalikon ang maong balatian pagdiha na sa pikas bahin. Kung kana nga pahayag mapamatud-an man gani sa Biblia, nan akong masulti nga aduna gyu’y katungod si Mr. Coe sa iyang pahayag.”

⁸⁵ Ug usa ka ministro ang nagpataas sa iyang kamot, ug ingon niya, “Halangdon, sir, mahimo ko bang isaysay kini?”

Ug miingon ang huwes, “Sige isaysay.”

⁸⁶ Ug mitindog ang ministro, ug miingon, “Usa niana ka gabii, sa usa ka mabalod nga dagat, kaniadtong hapit nang maunlod sa kinahiladman ang usa ka gamay’ng sakayan, og wala na gayu’y paglaum nga maluwas pa. Nakita nila si Jesus, ang Anak sa Dios, nga nagalakaw sa tubig. Ug ang usa sa mga apostoles, nga ginganla’g Pedro, miingon, ‘Kung Ikaw man ugaling kana, Ginoo, paanhaa ako diha Kanimo ibabaw sa tubig.’” Ug ingon pa ang ministro, “Miingon ang Ginoo ngadto kang apostol Pedro, ‘Umari ka.’ Ug minaug siya gikan sa sakayan, sir, milakaw nga sama gayud ni Jesus, nga nagalakaw ibabaw sa tubig. Apan sa diha nga nahadlok siya, nan hinay-hinay siya nga miunlod sa wala pa man siya nakaabot kang Jesus.”

Miingon ang huwes, “Sirado na ang kaso.”

Ang gikinahanglan nato mao ang pagpanguna sa Balaang Espiritu, og dili intelektuwal nga mga tawo.

⁸⁷ Si Saul, nga anak ni Kish, gihimo kaniadto nga kapitan nga manguna sa mga tawo, ug nagdala siya og duha ka libo nga mga kalalaken-an, ug nagdala pud si Jonathan og usa ka libo. Ug miataki si Jonathan ngadto sa usa ka kampo ug gipangpatay ang usa ka pundok sa mga Ammonihanon, mga Ammonihanon, diay. Ug sa—sa napatay na niya sila, gipatingog ni Saul ang trumpeta, ug miingon, “Tan-awa ninyo ang gibuhat ni Saul.” Hinay-hinay na siya nga nahimong mapasigarbohon.

⁸⁸ Ngani sa higayon nga ang usa ka tawo nahimo nang usa ka bantugang Doktor sa Divinidad, o kaha nakabaton lang og diyutay’ng butang sa iyang ngalan, siya’y nahimong, halos, nahibalo-na-gyud-sa-tanan.

⁸⁹ Ang mga kalalaken-an sa Dios mapainubsanon man nga mga kalalaken-an. Ang mga tawo sa Dios mapainubsanon gyud nga mga tawo. pero pag aduna kamo’y makita nga nagaingon nga nadawat na kono nila ang Balaang Espiritu, ug hinay-hinay pud nga ginapahilayo ang ilang mga kaugalingon, nga daw sa, wala nakabaton sa Pagtoo, og padayon ra, sa pagpaningkamot nga mamahimong usa ka butang nga dili sila mao, hinumdumi n’yo, wala pa gayud nila nadawat si Ginoong Jesus.

⁹⁰ Dayon atong makaplagaan nga nagplano ang kaaway. Ug nga sudlon niya kadtong gamay’ng pundok sa mga tawo sa Dios, ug lugiton niya ang tuo nga mata sa maong mga tawo.

⁹¹ Ingon niana sa kanunay ang ginapaningkamotang buhaton sa kaaway, ang lugiton ang duha ka mata, kung mahimo niya, aron ang mga tawo dili na makakita sa kung unsay ginabuhat nila. Ingon niana usab ang ginapaningkamotang buhaton ni Satanas sa matag Cristohanon sa karong panahon, ang wagtangon ang espirituwal nga panan-aw sa maong tawo, aron nga monunot na lang kini sa intelektuwal nga pagsabot sa mga butang, ug dili na sa salabutan sa Balaang Espiritu nga mao’y nagapanguna unta kaniya.

⁹² Busa sa dihang giplano kadto sa kaaway, nga hapit na unta moabot ang dakung pagkapildi, niadtong tungora naglapa si Saul og duha ka dagkung baka ug gipadala kadto sa tibuok katawhan. Ug nanghinaut ko nga mamatikdan n’yo unta dinhi, nga sa dihang gipadala ni Saul ang gipanglapalapa nga mga bahin sa baka ngadto sa tibuok Israel, ug miingon, “Ang matag usa nga dili mosunod kang Samuel ug kang Saul, siya, mahisama niining baka, mamahimong ingon *niini*.” Nakita ba ninyo kung unsa ka malimbongon nga gisulayan niyang ihilambigit ang iyang kaugalingon sa tawo sa Dios? Daw sa—daw sa dili gayud maka-Cristohanon kadto! Ang gikahadlok man sa mga tawo kaniadto mao si Samuel. Pero naaghat silang tanan ni Saul nga mosunod kaniya tungod kay nahadlok man sila kang Samuel. “Managsunod sila kang Samuel *ug* kang Saul.”

⁹³ Ug sa makadaghang higayon usab, sa karong panahon, nga atong madungog ang ingon-niini! “Kami ang halangdong Iglesia. Kami ang Iglesia ni Cristo. Kami ang Iglesia sa Dios. Kami ang—ang *ingon niini-ug-ingon niana*.” Kana ang nakapahimo sa mga tawo nga mangahadlok, ug hunahunaon nga dinha ra kanila nagapamuhat ang Dios. Ug dili na nila gusto ang pagpanguna sa Balaang Espiritu. Mas gusto pa nila nga mosunod sa mga tawong ingon niana, tungod kay gusto ra man nilang ikinabuhi ang tagsa-tagsa nilang kinabuhi. Gusto nilang toohan kung unsa ra ang gusto nilang toohan.

⁹⁴ Nasabtan ba ninyo? Ang Balaang Espiritu mao ang atong Maghuhukom. Wala gyud kita sukad gihatagan sa Dios og usa ka papa, o usa ka obispo, o si kinsa pa man, para mao’y mahimong

Maghuhukom. Kondili ang Balaang Espiritu, ang Persona sa Dios, sa porma nga Balaang Espiritu, mao gayud ang atong Maghuhukom ug atong Magtutultol. Pero karon, nganong ingon niana man?

⁹⁵ Pasayloa n'yo kining mabagison, ug pinaka mabagison nga pahayag. Wala ko ginatuyo nga mahimong mabagison. Ginasulti ko lang kini tungod sa gugma.

⁹⁶ Tungod nagaingon man ang Balaang Espiritu nga sayup gayud para sa atong mga kababayan-an nga putlan nila ang ilang buhok. Ug sayup usab para sa atong mga kababayan-an nga magsul-ob og purol ug karsones, ug pintalan ang ilang mga ngabil ug nawong. Nagaingon ang Balaang Espiritu nga sayup gyud kana.

⁹⁷ Apan gusto nato og mga kalalaken-an nga mosulti kanato nga okey lang kana, “Basta sundon lang ko ninyo ug si Samuel.” Gusto nilang magkinabuhi sulod sa unom ka adlaw, og bisan unsa na lang nga pagkinabuhi nga gusto nila, basta mosimba lang inig ka Dominggo sa buntag. Ug usa ka intelektuwal nga nakagraduwar og kolehiyo nga dunay daghang titulo ang gusto nila nga mamulong para kanila og hamubo nga wali nga makapa. . . nga dunay diyutay'ng pagpakatawa, nga mogitik sa ilang mga dalunggan ug makapalingaw kanila, sama sa kung unsang salida o programa sa telebisyon. Ug moampo ra og diyutay para kanila, ug papaulion sila nga aduna na og—og kasiguradohan sa ilang kaugalingon ingon nga natuman na kono nila ang ilang relihiyon. Dili gayud kana ang kabubut-on sa Balaang Espiritu.

⁹⁸ Kondili gusto sa Balaang Espiritu nga magkinabuhi kamo nga diosnon, sa matag adlaw sa semana, ug sa matag gabii, og ginapahimulag ang inyong mga kaugalingon sa mga butang nga iya sa kalibutan.

⁹⁹ Apan dili man kana ang gusto sa iglesia. Ang gusto nila maoy usa ka tawo nga makahimo—nga makahimo sa paghubad sa Biblia sa paagi nga gusto nilang madungog Kini. Ayaw nilang magpatalinghug sa Tingog sa Balaang Espiritu nga nagapanulti pinaagi sa Biblia. Daghan kanila ang gustong moingon nga, “Ang mga adlaw sa mga milagro milabay na.” Mao man gud kana ang mogitik sa mga tawo. Gusto nilang moingon, “Wala na'y bautismo sa Balaang Espiritu.” Dili gani gusto sa mga tawo nga manglihok nga lahi sa kung unsay ginalihok sa tanang uban pa sa kalibutan. Ayaw nilang molakaw sa dalan nga limpyo ang ilang nawong, ug—ug limpyo ang panagway sa mga kalalaken-an, ingon nga walay sigarilyo sa ilang baba, ug—ug mga tabako, ug mga kuwako, ug—ug mga ingon-anang butang nga ginabuhat sa mga kalalaken-an. Ug ang mga babaye usab gusto nilang putlan ang ilang buhok nga mubo kaayo, ug—ug magsul-ob og mugbo nga mga bisti, ug ipakita ang ilang mga kurba, ug mga

ingon-anang butang nga gusto nila. Gusto nila—nila og mga kalalaken-an nga mosulti kanila nga, “Okey lang kana.”

¹⁰⁰ Bueno, niadtong miaging gabii, dunay miduol nga lalaki para sultihan ako, nga tungod kay nagwali kono ako batok sa ingon niana, mao nga may usa ka dakung denominasyon, mga lima kono kanila, ang miingon, “Biyaan na namo si Igsoong Branham ug dili na magkaaduna pa og unsa man nga kahilambigitan kaniya. Mahimong bakwion mo kanang mga teyp, ug mangayo’g pasaylo kanila, kay kon dili biyaan ka namo.”

¹⁰¹ Ingon ko, “Mobarug ako sa Pulong sa Dios. Kung kuhaon man ang tanan-tanan sa kinabuhi ko, magpabilin gihapon ako sa Pulong. Ug ako . . .”

Miingon, “Bueno, dili mo ba gayud bakwion ang *ingon niani-ug-ingon niana* nga teyp?”

¹⁰² Ingon ko, “Sukad-sukad wala gyud ako nagwali og unsa man, sa tibuok kong kinabuhi, nga akong gikaulaw. Mao nga wala ako’y bakwion nga mga teyp o mga rekord. Magpabilin gyud ako sa kung unsay ginaingon sa Balaang Espiritu. Kana’y akong ikinabuhi ug pakamatyan.” Wala ko nagapangandak sa akong kaugalingon. Kondili ginahulagway ko lang kung unsay nagakahitabo karon, aron inyong makita ug masabtan. Nga ang gusto sa mga tawo mapangunahan sila sa mga tawo ra usab.

¹⁰³ Ayaw nila kang Samuel kaniadto. Busa sa wala pa nila gidihogan si Samuel ingon nga hari . . . o si Saul diay, ingon nga hari, pasayloa ko, giadtoan sila pag-usab ni Samuel. Ug isulti ko kini sa pinulongan nga sama sa iyang pagkasulti niini kon sa karong panahon. Mahimo pud ninyo kining basahon. Ingon siya, “Unsa ba’y problema kung ang Dios mismo ang inyong Hari?”

“Bueno, dili man gud namo makita ang Dios.”

¹⁰⁴ “Bueno, ako man ang Iyang representante,” ingon si Samuel, “aduna ba ko’y gisulti kaninyo sukad og bisan unsang butang nga sayup? Aduna ba’y bisan unsang butang nga akong gipropesiya nga wala nahitabo sa ingon ka eksakto kung giunsa ko pagsulti nga mamahitabo kini? Dili ba ang Pulong man sa Ginoo ang akong gisulti kaninyo? Ug ipangutana ko kini kaninyo: Sukad-sukad ba miduol ako kaninyo aron mangayo sa inyong salapi? Aduna ba sukad og unsa mang butang nga gikuha ko gikan kaninyo? Aduna ba ko’y gipahayag kaninyo sukad og bisan unsang butang kondili ang tukma lang gayud nga MAO KINI ANG GINAINGON SA GINOO? Ug gipanghimatud-an man kini sa Dios, sa matag higayon, nga mao kini ang Kamatuoran.” Ug nagpadala ang Dios og kilat ug dalugdog ug nagpaulan (Kabalo na mo sa maong Kasulatan, kamo, dinha mismo.) aron pamatud-an nga si Samuel mao ang tigpamaba sa Dios.

105 Ug ingon nga si Samuel hingpit nga girepresentar kaniadto: Karong panahona, ang Balaang Espiritu—ang Balaang Espiritu ang tigpamaba sa Dios: nga ginapamulong sa ingon ka eksakto kung unsay ginaingon sa Biblia; nga nagatoo gayud sa kung unsay giingon sa Biblia, ug dili mosimang Niini, bisan gamay.

106 Apan gusto man gud nila kaniadto og usa ka tawo nga magsulti kanila og lahi. Ug dili man pud masulti sa mga tawo nga ang propesiya ni Samuel dili hingpit. Mao nga mitubag sila ug miingon, “Samuel, ang tanan nga imong gisulti diha sa Ngalan sa Ginoo, gipahitabo man sa Ginoo sumala gayud sa imong giingon. Wala gani ni usa ka sayup. Wala sab ka sukad miduol kanamo para manglimos kanamo og salapi. Ikaw man mismo ang nagsustento sa imong kaugalingon. Wala pud ka sukad mihangyo kanamo nga mobuhat og unsa mang daku, og mahinungdanong butang para kanimo. Misalig ka sa imong Dios, ug Iya kang gipalingkawas sa tanang butang. Ug tinuod man usab ang imong mga gipamulong. Tungod ang tanan-tanan nga gisulti mo diha sa Ngalan sa Ginoo nahitabo man gyud sumala sa imong giingon. Apan bisan pa man gusto gihapon namo og usa ka hari.”

107 Nakita ba ninyo ang kasukwahian? Inyo—inyo bang nakita ang—ang pagkamaliputon sa yawa, nga nagapanglihok sa tawo? Imbis nga ipasakop unta sa lalaki o babaye ang iyang kaugalingon ngadto sa Balaang Espiritu, ug magpatalinghug sa kung unsa ang MAO KINI ANG GINAINGON SA GINOO, para sa usa ka putli nga kinabuhi, usa ka walay-buling nga kinaiya, para sa usa ka lahi nga pagkinabuhi, ingon nga usa ka talagsaong katawohan, usa ka balaang nasud, usa ka katawohan nga lahi og linihokan; gusto man hinoon nila nga mahisama sa kalibutan, ug manglihok nga sama sa kalibutan, ug motambong sa kung unsang iglesia nga nagaingon, “Okey lang kana, manglihok nga sama niana ug magpadayon lang.”

108 Nakita ba ninyo kung unsa kini? Ginaingon nila, “Wala ma’y ingon-anang butang nga sama sa pagpang-ayo. Oh, ang bautismo sa Balaang Espiritu katukoranan lang man sa iglesia kaniadto.” Sa laing pagkasulti, kaniadto tawo na ang gipili sa Dios, gitangtang na ang Balaang Espiritu gikan sa iglesia, ug gitugotan nga ang denominasyon na kono ang magpadayon niini. Dili, dili gayud. Dili gayud ingon niana. Ang Balaang Espiritu, ang Pulong sa Kamatuoran, mao man ang magagiya kaninyo hangtud nga moabot si Jesus. Pero sa ingon niana man kini—kini napaingon.

109 Naghari si Saul kaniadto. Daghan siya’y. . . Aduna siya’y daghang mga sumusunod. Oh, aduna siya’y maanindot nga mga hinagiban. Aduna sab siya’y mga mag-aawit. Aduna siya’y mga kalasag, ug aduna pud siya’y mga bangkaw. Oh, nalabwan niya ang tanang uban pa nga mga nasud. Ug gidala niya katawhan sa usa ka demokrasya nga labaw pa sa unsa mang butang nga sukad-sukad nadungog ni kinsa man.

¹¹⁰ Ug eksaktong ingon niana ang gibuhat sa atong mga denominasyon ug mga kaiglesiahan karong panahona. Kami ang dunay pinakadagkung mga bilding sa simbahan sa kalibutan. Anaa kanamo ang pinakamaanindot og binistihan nga mga tawo sa kalibutan. Kami sàb ang may pinakahataas og kahibalo nga mahimong ikapasundayag.

¹¹¹ Sama niadtong binansay nga mga sundalo ni Saul nga batid mogamit og bangkaw, ug mahimo nila kadtong ipatuyok ug maniobrahon hangtud sa punto nga gikahadlok na sila sa mga nasud. Sila'y binansay gayud nga mga tawo, ug tanan na. Apan, usa niana ka adlaw, miabot ang punto nga adunay usa ka tighagit nga mitungha. Ug tungod niadto gipangnerbiyos ang tibuok kasundalohan sa Israel hangtud nga nanagtindog na lang sila, nga nagapangurog sa kahadlok. Gihagit man sila ni Goliath, "Kung ang inyong Dios mao gayud Siya kanang inyong ginaingon! Binansay man gyud kaha kamo." Ug gihagit niya sila. Wala na sila kahibalo kung unsay buhaton. Tungod ang ilang maanindot, og pinasinaw nga mga hinagiban dili man magpulos. Ang ilang mga bangkaw dili man sàb magpulos. Aduna gyu'y usa ka butang nga wala pa nila sukad nadungog, kaniadto, ang nagakahitabo.

¹¹² Ug ingon nga may bug-os nga pagtahud ug diosnong pagrespeto, ug pasidungog ug dignidad, ug paghigugma ug Cristohanong pagpakig-fellowship, ginasulti ko kini: Akong nabasa, niadtong miaging adlaw, sa usa ka mantalaaan sa Africa, kon diin kining atong anak ni Kish, ang atong tig-atubang sa hagit sa pagpang-ebanghelyo, sa dihang may usa ka Mohammedan ang naghagit kaniya, kang Billy Graham. Ang ingon, "Kung Dios ang inyong Dios, nan kinahanglan ayohon Niya ang mga may sakit sama sa Iyang gisulti nga Iyang pagabuhaton." Ug ang anak ni Kish, kauban ang tanang uban pa nga mga kasundalohan, nanghilum lang sila ug mibiya sa nasud, nga napildi. Makauulaw gayud. Tungod Dios man ang atong Dios.

¹¹³ Aduna lagi kita'y maanindot nga mga simbahan. Maayo ang atong pagpang-ebanghelyo. Aduna kita'y sinuholan nga mga mag-aawit. Anaa kanato ang pinakamaayo nga mga choir, ang pinakataas nga mga tore sa simbahan sa tibuok nasud. Anaa kanato ang pinakahinashasan nga mga kalalaken-an, og ang pipila sa mga pinakakuwartahan. Anaa kanato ang mga intelektuwal. Aduna kita'y teolohiya nga ingon gayud ka tataw ang pagpasabot; mahimo natong iwali kini; mahimo natong ipahayag kini. Mahimo sàb nato ang pagpang-ebanghelyo ug maaghat ang mga tawo, ug makapangkabig og minilyon, kada tuig, ngadto sa iglesia. [Blangko nga bahin sa teyp—Ed.] Pero ang sinuholan natong mga mag-aawit, ang intelektuwal natong ebanghelista, wala gyu'y hibangkaagan kung unsaon sa pag-atubang ang ingon niadto nga hagit. Wala sila'y kasayoran bahin

niana. Wala gani sila'y unsa man nga hingsayran mahitungod sa Iyang gahum sa pagpang-ayo, sa bautismo sa Espiritu Santo, sa gahum nga makawagtang sa landong sa kamatayon diha sa usa ka tawong naghimalatyon na tungod sa kanser, ug makapalingkawas kaniya. Wala gayud sila'y hibangkaagan bahin niana. Tungod wala man gud sila nabansay diha niana nga natad sa panggubatan, sama kaniadto ni Saul ug sa iyang grupo nga hinimo-sa-tawo.

¹¹⁴ Apan mosulti ako ngadto sa mga tawo sa Dios, ug kaninyo mga anak, aron nga inyong mahibaloan nga dili gyud kamo biyaan sa Dios nga wala man la'y pagpamatuod.

¹¹⁵ Hinoon wala gyu'y nahibaloan, si Saul, walay unsa man nga hingsayran si Saul mahitungod niadto. Apan ang Dios aduna ma'y usa ka gamay'ng David nga atua didto luyo sa bungtod sa kon asa man, og wala niya ginapakaon ang mga karnero og pang-simbahan nga mga sagbot. Kondili ginapangunahan niya ang mga niini ngadto sa daplin sa mga tubig nga malinaw ug sa lunhaw nga mga sibsibanan. Ginabantayan niya og ayo ang mga karnero sa iyang amahan. Ug kung aduna gani moduol didto, nga kaaway, aron sakmiton ang usa sa mga karnero sa iyang amahan, hingsayran na niya ang gahum sa Dios nga mao'y moluwas sa maong karnero.

¹¹⁶ Aduna sa gihapon ang Dios og usa ka David, sa kon asa man, nga may hibangkaagan kung unsaon sa pagluwas ang usa sa mga karnero sa Dios, pinaagi sa gahum sa Dios. Hingsayran gihapon niya ang tanan mahitungod niini.

¹¹⁷ Misalig lang gyud si David kaniadto. Wala gani siya'y hibangkaagan mahitungod sa hinagiban ni Saul, wala saòb siya nangandoy og bisan usa niadto. Wala siya nangandoy og bisan usa niadtong ilang mga denominasyon. Wala siya nangandoy nga magsul-ob niadto nga hinagiban. Ang ingon niya, "Wala ako'y hibangkaagan bahin niana. Apan moadto ako pinaagi sa gahum nga akong nahibaloan." Tigpakaon siya sa mga karnero sa iyang amahan. Giatiman niya ang mga sibsibanan. Gipakaon niya ang mga karnero og husto nga matang sa pagkaon, ug nabuhi sila ug nahimong himsog.

¹¹⁸ "Ang tawo dili mabuhi sa tinapay lamang. Kondili sa matag Pulong nga nagagula sa baba sa Dios, mabuhi ang tawo." Ginapakaon sila sa tinuod nga Magbalantay. "Si Jesus Cristo nga mao sa gihapon kagahapon, karon, ug hangtud sa kahangturan." Ug kung sakmiton man sa kaaway ang usa, pinaagi'g balatian, nasayod gayud siya sa gahum sa Dios.

¹¹⁹ Matikdi n'yo ang gamay'ng si David, nga nagtindog didto. Giingnan, "Kanang si Goliath manggugubat na daan, sukad pa sa iyang pagkahimugso. Ug sukad pa sa iyang pagkabata, wala siya'y nahibaloan gawas lamang sa bangkaw ug hinagiban.

Binansay gyud siya og ayo. Usa siya ka teologo. Ug wala gyud ka'y hibangkaagan bahin niana."

¹²⁰ Ingon niya, "Tinuod kana, sir. Wala bitaw ko'y hibangkaagan mahitungod sa iyang pagbansay sa teolohiya. Apan dunay usa ka butang nga nahibaloan ko, nga, sa dihang dunay kaaway nga miabot, para kuhaon unta ang usa sa mga karnero sa akong amahan, gigukod ko kadto pinaagi sa gahum sa Dios. Giluwas ko ang maong karnero. Ako kadtong gidala og balik nga luwas og may maayong panglawas. Ako kadtong gidala og balik ngadto sa malandong og lunhaw nga mga sibsibanan ug sa mga tubig nga malinaw. Ug ingon nga gitugyan sa Dios kadtong leon nganhi sa akong mga kamot, ako kadtong gipatay sa dihang gikuha niadto ang usa sa—sa mga karnero, ug gitugot gani Niya nga akong mapatay ang oso, mao nga ubanan gyud gihapon ako sa Dios sa Langit aron mapatay kining dili-tuli nga Filistihanon."

Gikinahanglan nato ang pagpanguna sa Balaang Espiritu. Wala ako masayod sa akong mga adlaw; walay si kinsa man ang nasayod.

¹²¹ Niadtong miaging buntag samtang naghigda ako sa akong higdaanan. Ug ako'y... nakatulog ko, ug nagdamgo ko nga nagsakit kono si Joseph, ug ako siyang gialsa aron maiampo siya. Ug sa pagmata na nako, nabalaka kaayo ako. Ingon ko, "Bueno, magkasakit man tingali si Joseph."

¹²² Ug akong nakita, nga may milabay sa akong atubangan, nga usa ka gamay'ng, maitum nga anino, nga medyo kaphion ang kolor. Ug mora kadto og ako. Ug giobserbahan ko kadto. Ug dunay nagsunod niadto nga usa ka Tawo nga nakaputi, ug ang Dios kadto. Gitan-aw ko ang akong asawa, para tan-awon kung nagmata na ba siya, aron ipakita ko unta kaniya, o kung makita ba kaha niya ang maong panan-awon. Pero tulog pa man siya niadto.

¹²³ Ingon ko, "Oh, pasayloa ko, Ginoo. Tungod, dugay nang ingon-ana ang akong kinabuhi. Kinahanglan Mo pa nga ituklod ako sa tanan-tanan nga akong ginabuhat. Sa matag higayon nga dunay unsa mang butang nga mahitabo, maghunahuna ko nga Ikaw ang nagabuhat niadto. Pero akong naamgo nga si Satanas man diay kadto nga gapaningkamot aron ipahilayo ako niadto." Ingon ko, "Kung mapangunahan Mo lang gyud ako." Ug samtang nagtan-aw ako, nakita ko ang pinakamatahum nga nawong nga akong nakita sukad-sukad sa usa ka tawo. Anaa Siya sa akong atubangan, nga nagatan-aw pud. Gipataas Niya ang Iyang kamot ug gihawiran ang akong kamot, ug hinay-hinay nga mipaingon sa *niini* nga direksyon. Dayon mibiya na kanako ang maong panan-awon. Niadtong miaging Dominggo sa buntag, ako'y, nakamata ko og sayo. Pero Sabado kadto, ang kining maong panan-awon. Niadtong...

¹²⁴ Pirmi kong mabalaka, pirmi kong mahunahuna nga basin mamatay na ko. Tungod, singkwenta na man gud ko, mao nga, ang akong panahon dili na . . . nahunahuna ko nga dili na gyud magdugay. Ug nahunahuna pud nako kung unsa na kaha ako pag didto na sa theophany, sa langitnon nga lawas. “Makita na kaha nako ang akong bililhon nga mga higala ug, ingnon tà, nga usa na ka gagmay’ng puti nga panganod nga nagalabay-labay, ug moingon, ‘Milabay si Igsoong Neville,’ o, dili kaha siya makasulti og, ‘Kumusta, Igsoong Branham?’ Ug pagmoabot na si Jesus, nan mamahimo na usab akong tawo.” Pirmi gyud nakong mahunahuna kana.

¹²⁵ Nagdamgo pud ko nga atua kono ko sa Kasadpan. Ug mipaingon kono ko sa usa ka gamay’ng lugar nga dunay mga sagebrush nga tanum, ug kauban nako ang akong asawa, ug gikan kono kaming namingwit og trout. Ug mihunong ako ug—ug giablihan ko ang ganghaan. Ug maanindot kaayo ang kalangitan. Dili kadto sama sa mga makita sa niining walog dinhi. Bughaw kadto, ug maanindot og maputi ang mga panganod. Ug miingon ko sa akong asawa, ingon ko, “Dugay ra unta kitang mianhi dinhi, dugay na nga panahon unta, honey.” Ingon siya, “Alang sa mga bata, mao gayud unta, Billy.” Ingon ko, “Tungod . . .” Ug nakamata ako.

¹²⁶ Nahunahuna ko, “Sige man kong gadamgo! Ngano kaha.” Ug mitan-aw ako, ug naghigda tupad nako ang akong asawa.

¹²⁷ Ug gitaas ko ang akong unlan, sama sa ginabuhat sa kadaghanan kaninyo, gipahimutang ko ang akong ulo sa—sa may ulhanan sa katre, ug giunlanan ang akong mga kamot. Ug naghigda ko didto nga nakaingon *niini*. Ug ingon ko, “Buena, unsa gyud kaha ang mahitabo, pag didto na ako sa pikas nga kinabuhi. Singkwenta na ko, pero hangtud karon wala pa ko’y nabuhat nga unsa mang butang. Kung aduna lang unta ako’y mabuhat para makatabang sa Ginoo, kay nasayod ko nga dili na ako magdugay ingon nga mortal. Milabay na ang katunga nga panahon sa akong kinabuhi, o tingali, lagpas na gani sa katunga. Kung mabuhi pa ako hangtud sa kagulangan nga sama sa akong mga paryente, sa gihapon milabay na ang katunga nga panahon sa akong kinabuhi.” Ug mitan-aw ko sa palibot. Ug naghigdahigda pa ko didto, pero hapit na kong mobangon. Mga alas siete na man kadto. Ingon ko, “Moadto lang siguro ko sa simbahan, karong buntaga. Tungod pagaw man ako, og gusto ko usab nga madungog si Igsoong Neville nga magwali.”

¹²⁸ Busa miingon ko, “Nagmata ka na ba, honey?” Ug hinanok pa kaayo siya.

¹²⁹ Ug dili ko gustong masayloan ninyo kini. Tungod gibag-o gyud ako Niadto. Dili na ako ang mao ra nga Igsoong Branham nga sama sa kung unsa ako kaniadto.

130 Ug mitan-aw ako. Ug adunay Butang nga akong nadungog, nga padayong nagaingon, “Nagasugod ka pa lang. Padayon lang sa pakiggubat. Magpadayon ka lang.”

131 Gilingo-lingo ko ang akong ulo sa makadiyut. Nahunahuna ko, “Bueno, tingali naghunahuna lang ko og ingon niini.” Kabalo mo, magkaaduna man gud ang mga tawo og kung unsa ra nga mga paghanduraw. Ug ingon ko, “Tingali’g gihanduraw ko lang kini.”

Miingon na pud Kadto, “Padayon lang sa pakiggubat. Magpadayon ka lang. Magpadayon ka lang.”

132 Ingon ko, “Tingali ako ra mismo ang nagsulti niini.” Ug gitak-um ko ang akong mga ngabil, ug gibutang ko ang akong kamot nganhi sa akong baba.

133 Ug mitingog na usab Kadto, miingon, “Basta magpadayon ka lang. Kung nahibaloan mo lang kung unsa ang gikatagana pagkahuman niining panaw!”

134 Ug daw sa nadungog ko si Graham Snelling, o si kinsa man, nga miawit niining maong awit nga sama niini (Ngani ginaawit man nila kini dinhi, ni Anna Mae ug ninyong tanan.):

Mibati ako og kamingaw nga makauli na ug nagmasulob-on, ug gitinguha kong makita si Jesus,
 Gusto kong madungog ang maanindot nga pagbagting sa mga kampanilya didto sa dunggoanan.
 Pagahayagan niini ang akong dalanon ug ang tanang mga kahadlok pagawagtangon.
 Ginoo, tugoti akong makita ang luyo sa tabil sa panahon.

Nadungog n’yo na man kini nga ginaawit dinhi sa iglesia.

135 Ug Aduna na sàb ko’y nadungog nga miingon, “Gusto mo bang makita ang luyo sa tabil?”

Ingon ko, “Makatabang gayud kana kanako.”

136 Ug mitan-aw ako. Sa usa ra ka gutlo, ako...sa gilayon nahiabot ako sa usa ka gamay’ng Dapit nga nakahandag. Milingi ako, ug atua ako, nga naghigda sa higdaanan. Ug ingon ko, “Pagkatalagsaon niini.”

137 Bueno, dili ko unta gustong isulti pa ninyo kini. Tungod para man gyud kini sa akong iglesia, o sa mga karnero nga akong ginapastoran. Kon unsa man kadto, kon anaa ra ba ako niining lawasa o kaha anaa sa gawas, o kon usa man kadto ka paglalain, pero dili gyud kadto sama sa unsa mang pananawon nga nagkaaduna ako. Mahimo man gud nako nga motan-aw Didto, ug mahimo pud nako nga motan-aw dinhi.

138 Ug sa pag-abot na nako niadtong Dapit, wala pa gyud ko nakakita sukad og ingon niadto ka daghan nga mga tawo nga nagpaingon kanako nga nanagdagan, og nanagsinggit, “Oh, bililhon namong igsoon!”

139 Ug mitan-aw ako. Ug may mga batan-ong kababayan-an, tingali sila’y anaa sa mga baynte anyos ang pangidaron, o dise-otso hangtud baynte, migakus sila kanako, ug nanagsinggit, “Bililhon namong igsoon!”

140 Ania sàb nagaabot ang mga batan-ong kalalaken-an, nga anaa sa kapiskay nga hugna sa ilang pagkabatan-on. Ug nagagilak-gilak ang ilang mga mata nga daw sa mga bitoon diha sa mangitngit nga gabii. Ang ilang mga ngipon ingon ka puti sama sa perlas. Ug nanagsinggit sila, ug migakus kanako, ug nanagsinggit, “Oh, bililhon namong igsoon!”

141 Ug mihunong ako, ug mitan-aw ako. Ug mibat-an-on ako. Akong gilingi ang tigulang kong lawas nga nahagda didto, nga giunlanan ang akong mga kamot. Ug miingon ko, “Wala ako makasabot niini.”

142 Ug migakus kanako kadtong mga batan-ong kababayan-an. Bueno, kabalo ko nga nagkasagol ang mga mananambong dinhi karon, ug mao nga isulti ko kini nga may kalumo ug kaaghop sa Espiritu. Ang mga lalaki dili mahimong mogakus sa mga babaye nga wala man la’y tawhanong sensasyon; apan wala na’y ingon niana Didto. Wala na didto’y kagahapon ni ugma man. Wala pud sila gipangkapoy didto. Sila’y . . . wala pa usab ko nakakita og ingon niadto ka maanyag nga mga kababayan-an sa tibukong kinabuhi. Ang ilang mga buhok nakadunghay hangtud sa ilang hawakan, og hatag-as ang ilang mga sayal hangtud sa ilang mga tiil. Ug nagagakus sila kanako. Pero dili gani kadto sama sa paggakus sa kaugalingon kong igsoong babaye, nga anaa dinha, pag mogakus siya kanako. Wala nila ako ginahalokan, ug wala pud nako sila ginahalokan. Butang kadto nga ako—ako wala gayud og—og bokabularyo, walay igong mga pulong nga akong maisulti. Kon “pagkahingpit” man dili gihapon arang makahulagway niadto. Kon “pagkamaanindot” dili sàb arang makahulagway niadto, dili gayud. Tungod butang kadto nga dili ko gayud . . . Kinahanglan ninyo mismo nga mamaatua Didto.

143 Ug mitan-aw ako paingon *niini* nga direksyon, ug paingon *niana* nga direksyon. Ug nagapadulong sila, nga mga linibo. Ug miingon ko, “Wala ako makasabot niini.” Ingon ko, “Bueno, sila . . .”

144 Ug ania miabot si Hope. Ang una ko kadtong asawa. Miduol siya, ug wala siya miingon, “Bana ko.” Ang ingon niya, “Bililhon kong igsoon,” ug paggakus niya kanako, dunay usa pa ka babaye nga atua didto, nga migakus pud kanako, ug dayon gigakus ni Hope kining maong babaye; ug ang matag usa usab. Ug nahunahuna ko, “Oh, pagkalahi gayud niini nga butang. Dili

kini mamahimong . . . Aduna gayu'y . . .” Nahunahuna ko, “Oh, tinguhaon pa ba nako nga mobalik pag-usab nianang tigulang nga lawas?”

¹⁴⁵ Dayon mitan-aw ko sa palibot. Sa hunahuna ko, “Unsa gyud kaha kini?” Ug mao nga mitan-aw ko, og ayo. Ug ako—ingon ko, “Ako—wala ako makasabot niini.” Pero si Hope mora siya og, oh, usa ka importanteng bisita. Dili siya lahi, pero mora lang siya og importanteng bisita.

¹⁴⁶ Ug niadtong tungora nadungog ko ang usa ka Tingog nga nagsulti kanako, nga atua sa maong lawak, miingon, “Mao na kini ang imong giwali nga Espiritu Santo. Kini mao ang hingpit nga Gugma. Ug walay makasulod Dinhi kon wala Niini.”

¹⁴⁷ Mao nga mas nakasigurado na ako, kay kaniadto sa kinabuhi ko, nga hingpit gayud nga Gugma ang gikinahanglan, para makasulod Didto. Wala na didto’y pagpangabugho. Wala na didto’y pagka-kapoy. Wala na sàb didto’y kamatayon. Wala na pu’y balatian, Didto. Ang pagka-mortal; dili—dili na makapatigulang kaninyo. Ug ang . . . Didto dili na sila makahilak. Kondili puro lang gayud kalipay.

¹⁴⁸ “Oh, bililhon kong igsoon!” Ug ila akong gialsa, ug gipahimutang ako diha sa usa ka daku kaayo og mahabog nga puwesto.

¹⁴⁹ Sa hunahuna ko, “Wala man ko gadamgo. Ginalingi man gani nako ang akong—akong lawas nga nagahigda dinhi sa higdaanan.”

¹⁵⁰ Ug ila akong gipapahimutang didto. Ug miingon ko, “Oh, dili baya ko angay’ng molingkod dinhi.”

¹⁵¹ Ug ania nagaabot ang mga kababayen-an ug mga kalalaken-an, nga anaa sa pinakamaanindot nga hugna sa ilang pagkabatan-on, gikan sa parehong bahin, nga nanagsinggit. Ug may usa ka babayeng atua didto, ug misinggit siya, “Oh, minahal kong igsoon! Oh, nalipay kaayo mi nga makita ka Dinhi.”

Ingon ko, “Wala gyud ko makasabot niini.”

¹⁵² Ug dayon kadtong Tingog nga nagasulti, sa may ibabaw nako, miingon, “Kabalo ka, nahisulat man sa Biblia nga ang mga propeta nahiusa uban sa ilang mga katawohan.”

Ug ingon ko, “Oo. Nahinum dum ko niana sa Kasulatan.”

Miingon, “Bueno, kini mao kanang higayon nga mahiusa ka na uban sa imong mga katawohan.”

Ingon ko, “Kung ingon niana tinuod gyud diay sila, ug nabati ko sila mismo.”

“Oh, oo.”

¹⁵³ Miingon ko, “Pero, minilyon man lagi sila. Dili man ingon niana ka daghan ang mga Branham.”

¹⁵⁴ Ug miingon kadtong Tingog, “Dili sila mga Branham. Sila’y imong mga kinabig. Sila kadtong mga gidala mo paingon sa Ginoo.” Ug ingon pa, “Ngani ang pipila nianang mga kababayan-an dinha, nga sa tan-aw mo mga maanyag kaayo, lagpas nubenta anyos na ang pangidaron niadtong gidala mo sila ngadto sa Ginoo. Dili ikatingala nga nagasinggit sila, ‘Bililhon namong igsoon!’”

¹⁵⁵ Ug sila misinggit, og dungan, nga miingon, “Kung wala ka nagsangyaw, wala unta kami Dinhi.”

Mitan-aw ko sa palibot. Sa hunahuna ko, “Bueno, wala gyud gihapon ko makasabot niini.”

Ingon ko, “Oh, asa man si Jesus? Bug-os gyud akong, nagtinguha nga makita Siya.”

¹⁵⁶ Ingong sila, “Sa karon, anaa pa Siya sa mas hataas nga bahin, *dinha* mismo dapit.” Miingon, “Sa umaabot nga adlaw moabot Siya kanimo.” Kita n’yo? Miingon, “Gipadala man ka, ingon nga usa ka lider. Ug moabot ra unya ang Dios. Ug pagmoabot na Siya, pagahukman ka Niya sumala sa kung unsay imong gikatudlo kanila, una, kon sila ba’y makasulod o dili. Makasulod kami sumala sa imong gikatudlo.”

¹⁵⁷ Ingong ko, “Oh, nalipay kaayo ko. Si Pablo, kinahanglan ba usab niyang moatubang nga sama niini? Kinahanglan ba usab ni Pedro nga moatubang nga sama niini?”

“Oo.”

¹⁵⁸ Ingong ko, “Kung ingon niana giwali man sàb nako ang matag Pulong nga ilang giwali. Wala gyud ko sukad misimang Niini, sa usa man ka bahin ngadto sa pikas bahin. Ingong nga nagbautismo sila sa Ngalan ni Jesus Cristo, ako man usab. Ingong nga gitudlo nila ang bautismo sa Espiritu Santo, ako man usab. Unsa man ang ilang gikatudlo, gitudlo ko usab.”

¹⁵⁹ Ug misinggit kadto nga mga tawo, ug miingon, “Nasayod kami niana. Ug nasayod pud kami nga mouban kami kanimo, sa umaabot nga adlaw, pabalik ngadto sa yuta.” Miingon, “Moabot ra si Jesus, ug pagahukman ka na sumala sa Pulong nga imong giwali kanamo. Ug dayon kung dawaton ka na nianang higayona, hinoon dawaton man gyud ka,” ug miingon, “dayon imo na kaming ipresentar ngadto Kaniya, ingong nga mga tropeyo sa imong ministerio.” Ingong pa, “Imo kaming pangunahan ngadto Kaniya, ug, dungan, kitang tanan nga mobalik sa yuta, aron mopuyo na didto hangtud sa kahangturan.”

Ingong ko, “Kinahanglan ko pa bang mobalik karon?”

“Oo. Basta magpadayon ka lang gayud.”

¹⁶⁰ Mitan-aw ako. Ug nakita ko ang maong mga tawo, kutob sa pinakahalayo kong makita, nga padayon pang nagaduol, tungod nga gustong mohangop kanako, og nanagsinggit, “Bililhon namong igsoon!”

¹⁶¹ Niadtong tungora misulti na pud ang Tingog, “Ang tanan nga imong gihigugma, ug ang tanan nga naghigugma kanimo, gihatag sa Dios kanimo Dinhi.” Ug mitan-aw ako. Ug ania pud nagaabot ang akong iro kaniadto, og nagaduol. Ania sàb nagaabot ang akong kabayo, ug gisandig niya ang iyang ulo sa akong abaga, ug mibahihi. Miingon, “Ang tanan nga imong gihigugma, ug ang tanan nga naghigugma kanimo, gihatag sila sa Dios kanimo mismo, pinaagi sa imong ministerio.”

Ug nabati ko ang akong kaugalingon nga nabalhin gikan niadtong maanindot nga Dapit.

¹⁶² Ug mitan-aw ko sa palibot. Ingon ko, “Nagmata ka na ba, honey?” Tulog pa gihapon siya.

¹⁶³ Ug nahunahuna ko, “Oh Dios! Oh, tabangi ako, Oh Dios. Ayaw intawon itugot nga duna ko’y makompromiso nga usa ka Pulong. Tugoti akong magpabilin ra gyud nianang Pulonga, ug iwali Kini. Dili ko igsapayan kung unsa ma’y mahitabo, kung unsa ma’y ginabuhat sa uban; kung unsa man ka daghang mga Saul nga . . . mga anak ni Kish ang managpanungha, unsa man ka daghang mga *ingon-niini*, *ingon-niana*, o *uban pa*. Itugot, Ginoo, nga makapadayon ako paingon niadto nga Dapit.” Ang tanang pagkahadlok sa kamatayon . . .

¹⁶⁴ Ginasulti ko kini, nga anaa sa atubangan ko ang akong Biblia, niining buntaga. Aduna ko’y batang lalaki dinha, nga kuwatro anyos ang panuigon, nga ginapadaku. Aduna pud ko’y batang babaye nga nuebe anyos ang panuigon; ug usa ka dalaga, nga mapasalamaton ako, tungod nga nagalakaw sila sa dalan sa Ginoo. Dios, tugoti ako nga mabuhi pa, aron mapadaku ko sila diha sa pagpahamatngon sa Dios.

¹⁶⁵ Ug labaw pa niana, ingon nga ang tibuok kalibutan daw sa nanagsinggit kanako, mga kababayen-an ug kalalaken-an nga nubenta anyos ang panuigon, ug tanan nang uban pang mga edad, “Kung wala ka nagsangyaw, wala unta kami Dinhi.”

¹⁶⁶ Ug, Dios, itugot Mo nga makapadayon pa ako sa pakiggubat. Apan kung moabot man ang kamatayon, nan dili ako magkaguol. Tungod mamahimong kasadya, mamahimong kalipay gayud, nga makasulod dinha, og mogikan niini nga pagkadunot ug kaulawan.

¹⁶⁷ Kung ihulagway ko, kadto nga dapit, usa ka gatus ka bilyon ka milya ang kahabogon, usa ka bloke, ug didto ang hingpit nga Gugma, pero ang matag lakang sa niini nga dalanon, nagakahiktin nga nagahiktin, hangtud nga nakadangat kita sa kon diin na kita karon. Hinoon kini’y usa lang man ka landong sa pagkadunot, ingon nga adunay gamay’ng butang nga atong mahunahuna ug mabati nga aduna gyu’y usa ka butang sa kon asa man. Wala kita masayod kung unsa Kana.

¹⁶⁸ Oh, bililhon kong mga higala, mga minahal ko, mga pinangga ko sa Ebanghelyo, og mga anak ko diha sa Dios,

paminaw mo kanako, ingon nga inyong pastor. Kamo, kon aduna lang unta'y paagi para maisaysay ko kini kaninyo. Pero wala gayu'y igong mga pulong; wala ko'y makaplagan; tungod wala ma'y mahikaplagan bisan asa. Apan pagnahaman na kita niining atong kaulahiing ginhawa, mao na ang pinaka-mahimayaong butang nga wala n'yo sukad. . . Wala gyu'y paagi para maisaysay kini. Wala gayud. Dili gyud nako arang maisaysay kini. Apan bisan unsa man ang ginabuhat mo, higala, ihiklin ùsa ang tanang uban pang butang hangtud nga mabatonan mo ang hingpit nga Gugma. Hangtud nga moabot ka na sa punto nga mahimo mo nang higugmaon ang tanan, bisan ang tanang kaaway, og tanang uban pa.

¹⁶⁹ Tungod niadtong usa ka higayon nga pagduaw ko Didto, para kanako, nalahi gyud ako tungod niadto. Dili, dili, dili na ako mahimong mao ra sa gihapon nga Igsoong Branham nga sama kaniadto. Kon mauyog man ang eroplano, magapangidlap man ang kilat, kon may espiya man nga motiun og pusil kanako, o unsa man, wala na kana'y kabilinggan. Magpadayon gyud ako sa pakiggubat, pinaagi sa grasya sa Dios. Tungod, ginawali man nako ang Maayong Balita sa tanang binuhat ug sa matag tawo nga mahimo kong walihan, nga ginaaghat sila paingon nianang maanindot nga Yuta didto.

¹⁷⁰ Bisan medyo kini malisud. Mahimong nagkinahanglan kini og dakung kusog. Wala ako mahibalo kung unsa pa ka dugay. Wala kita mahibalo, sa pisikal nga pagkasulti. Sa. . . Basi sa pag-eksamin kanako niadtong miaging adlaw, ingon ang doktor, "Magkaaduna ka pa og baynte-singko ka tuig nga himsog, og maayo nga kinabuhi. Kusgan pa man ka." Hinoon nakatabang kadto kanako. Apan, oh, pero dili man tungod niana. Dili kini tungod niana. Kondili tungod kini sa kung unsa ang anaa sa kinasuloran *dinhi*. Kining may-pagkadunot siguradong pagailisan og walay-pagkadunot. Kining may-kamatayon siguradong pagailisan og walay-kamatayon.

¹⁷¹ Mahimong managpanungha man ang mga anak ni Kish. Ako. . . Hinoon ang tanang mga maayong butang nga ilang ginabuhat, wala ko'y unsa mang dautan nga masulti batok niana, ang pagpanghatag sa mga kabus ug ang pagkamanggihatagon. Ug hinumdumi n'yo, aba, miingon si Samuel kaniadto kang Saul, "Magapropesiya ka usab." Ug gani daghan niadto nga mga kalalaken-an ang mga halangdon, gamhanan nga mga magwawali, nga makawali sa Pulong nga sama sa mga arkanghel. Apan bisan pa niana dili man kadto mao'y kabubut-on sa Dios. Tungod ang Dios mismo ang angay'ng mamahimo nilang hari. Igsoong lalaki, igsoong babaye, tugoti n'yo nga ang Balaang Espiritu mismo ang manguna kaninyo.

Iduko sà nato ang atong mga ulo sa makadiyut.

Mibati ako og kamingaw nga makauli na
 ug nagmasulob-on gayud, gitinguha kong
 makita si Jesus,
 Gusto kong madungog ang maanindot nga
 pagbagting sa mga kampanya didto sa
 dunggoanan;
 Pagahayagan niini ang akong dalanon ug ang
 tanang mga kahadlok pagawagtangon;
 Ginoo, tugoti kaming makita ang luyo sa tabil
 sa panahon.

Ginoo, tugoti akong makita ang luyo sa tabil sa
 mga kagul-anan ug kahadlok,
 Tugoti akong masud-ong kadtong mahayag og
 madan-ag nga klima;
 Pagalig-onon niini ang among pagtoo ug ang
 tanang mga kahadlok pagawagtangon;
 Ginoo, tugoti sila nga makita ang luyo sa tabil
 sa panahon.

¹⁷² Sigurado ako, Ginoo, nga kung makita lang gyud niining
 gamay'ng iglesia, karong buntaga, ang luyo sa tabil: nan wala
 na'y pag-antus sa taliwala nila, og dili na gayud magkaaduna
 pa; wala na'y balatian; wala na'y unsa man kondili kahingpitan
 na lamang. Ug usa lamang ka ginhawa ang gintang Niini tali
 dinhi ug Didto, gikan sa pagkatigulang paingon sa pagkabatan-
 on, gikan sa panahon paingon sa Eternidad, gikan sa kabalaka
 sa ugma, ug sa kagul-anan sa kagahapon, paingon mismo sa
 panahon sa Eternidad nga diha na sa kahingpitan.

¹⁷³ Ginaampo ko, Dios, nga panalanginan Mo ang matag tawo
 dinhi, og kung aduna ma'y mga ania karon, Ginoo, nga wala
 pa nakaila Kanimo sa ingon-niana nga matang sa Gugma.
 Ug tinuod gayud, Amahan, nga walay makasulod niadtong
 balaan nga Dapit kon wala og ingon-niana nga matang sa
 Gugma, ang bag-ong Paghimugso, ingon nga natawo na pag-
 usab. Ang Balaang Espiritu, Dios, mao ang Gugma, ug nasayod
 kami nga tinuod kana. Bisan pa kung makapabalhin kami og
 mga bukid pinaagi sa among pagtoo, makabuhat man kami og
 dagkung mga butang, sa gihapon, kon wala Kana, nan dili gayud
 kami makasaka nianang mahimayaong hagdanan paingon didto.
 Apan kon makabaton kami Niana, nan pagabayawon kami
 Niana lagpas niining yutan-ong mga kabalaka. Ginaampo ko,
 Amahan, nga panalanginan Mo ang mga tawo nga ania dinhi.

¹⁷⁴ Ug hinaut, nga, ang matag tawo nga nakadungog kanako,
 karong buntaga, ipanulti unta nila kini nga Kamatuoran, nga
 Ikaw ang akong saksi, Ginoo, sama ni Samuel kaniadto, "Aduna
 ba ko'y gisulti kanila sukad og bisan unsang butang diha sa
 Imong Ngalan kondili kung unsa lang ang kamatuoran?" Sila
 na ang mohukom. Ingon nga gisulti ko kanila karon, Ginoo, nga

gidala Mo ako didto niadtong Yuta. Ug nasayod Ka mismo nga tinuod kini.

175 Ug karon, Amahan, kung aduna ma'y pipila dinhi nga wala pa nakaila Kanimo, hinaut nga mao na kini ang takna nga moingon sila, "Ginoo, ipahimutang kanako ang kabubut-on nga mamahimo Mong kabubut-on." Itugot kini, Amahan.

176 Ug karon, kamo, samtang ginaduko n'yo ang inyong mga ulo, mahimo n'yo bang ipataas ang inyong mga kamot, ug moingon, "Tampo ako, Igsoong Branham, nga ang kabubut-on sa Dios maanaa unta kanako."

177 Karon samtang anaa kamo dinha sa inyong nahimutangan, nga may pagkamalulot, bueno mahimo n'yo bang isulti sa Amahan, "Dios, sa kinasuloran sa akong kasingkasing, karon, ginasalikway ko ang tanang mga butang nga iya sa kalibutan. Ginasalikway ko ang tanan-tanan, aron higugmaon Ka ug alagaran Ka, sa tibuok kong kinabuhi. Ug buhaton ko na, sukad niining adlaw, sukad karon, nga mosunod Kanimo, sa matag Kasulatan sa Imong Biblia"? Kung kamo wala pa nabautismohan sa Cristohanong bautismo nan moingon, "Magpabautismo na ako, Ginoo."

178 "Kung wala pa nako nadawat ang Espiritu Santo..." Mahibaloan man ninyo kung nadawat na ba ninyo Kini. Tungod igahatag man Niini kaninyo—igahatag Niini kaninyo ang kasiguradohan ug Gugma nga inyong gikinahanglan. Oh, mahimong lahi ang ginabuhat n'yo kaniadto, nga nagkaaduna ra kamo og mga sensasyon, tingali'g sama nianang nakasinggit kamo o nakasulti og laing mga pinulongan, hinoon maayo man kana. Apan kung wala pa dinha ang Balaanong Gugma, toohi n'yo ako karon, og moingon, "Ginoo, ipahimutang sa kinasuloran sa akong kasingkasing, ug sa akong kalag, ang pag-abot sa Imong Espiritu, aron nga mahimo ko ang paghigugma, ug ang pagpasidungog, ug maangkon kanang Balaanong Gugma dinhi sa akong kasingkasing, karong adlaw, nga mao'y magadala kanako paingon nianang maong Yuta pagmobiya na kanako ang kaulahian kong gininhawa," samtang magaampo kita. Pag-ampo sab mo, mismo, karon. Sa kaugalingon n'yong paagi, pag-ampo mo, og hangyoa n'yo ang Dios nga buhaton kana para kaninyo.

179 Gihigugma ko kamo. Gihigugma ko kamo. Kamong bililhong ubanon na nga mga kalalaken-an nga ania dinhi, nga naningkamot og ayo kaniadto para masustentohan ang gagmay n'yong mga anak! Kamong makaluluoy'ng, tigulang na nga mga mama nga nanagpahid sa mga luha sa inyong mga mata! Ginasigurado ko kini kaninyo, minahal nga, igsoong babaye, dili na gayud ingon niana pag didto na kamo sa pikas luyo niining gininhawa. Nagatoo ko nga ania lang Kini mismo dinhi sulod sa lawak. Anaa kini sa usa mismo ka dimensyon ang atong

pagapuy-an. Ngani kining atong gikapuy-an sa karon usa ra gyud ka may-pagkadunot.

¹⁸⁰ “Apan ginatinguha ko, Ginoo, nga ang Imong kabubut-on ang matuman.” Pag-ampo mo, samtang nagaampo kita nga magkadungan.

¹⁸¹ Ingon nga matinahuron gayud, Ginoo, sumala sa basihanan sa Imong Pulong ug sa Imong Balaang Espiritu, malipayon kaayo kami nga among hingsayran kon diin naggikan ang among Pagkahimugso. Kami malipayon nga kami’y “nangatawo nga dili sa kabubut-on sa tawo, ni sa kabubut-on sa unod, kondili sa kabubut-on sa Dios.”

¹⁸² Ug among ginaampo, karon, Amahan, nga kining mga ania karon nga nagapangamuyo alang sa grasya sa pagpasaylo, nga ang Imong Espiritu unta ang mamuhat niana nga buluhaton, Ginoo. Tungod wala gayu’y paagi nga makabuhat ako niana; usa lamang ako ka tawo, usa na usab ka anak ni Kish. Mao nga gikinahanglan gyud Ikaw namo, ang Balaang Espiritu.

¹⁸³ Dios, itugot Mo nga mamahimo akong sama ni Samuel, ang usa nga nagasulti lamang sa Kamatuoran sa Pulong. Ug gipanghimatud-an Mo gihapon Kini, hangtud karon, ug nagatoo ko nga ipapadayon Mo gyud sa gihapon, basta magpabilin lang ko nga matinud-anon Kanimo.

¹⁸⁴ Hinaut nga madawat nilang tanan karon ang Kinabuhing Walay Katapusan, Amahan. Hinaut nga kining adlaw na dili na mobulag kanila. Sa higayon nga inig mobiya na sila niining kalibutana, hinaut nga kining, bag-ohay ko lang nga gisulti kanila, mamahimo gayud nga realidad. Ug samtang ania kami dinhi, karon, ingon nga mga mortal, nga nagatan-aw sa among orasan, nga nagahunahuna sa among paniudto, sa among trabaho pagkaugma, sa mga kabalaka ug mga pagpangabudlay sa kinabuhi, pero dili na gayud mamaingon niini didto. Tungod mahanaw na man ang tanan niini. Dili na magkaaduna pa og mga kabalaka; ug puro na lang gayud mahimayaong kalipay nga Walay Katapusan. Ihatag kanila ang ingon niana nga matang sa Kinabuhi, Amahan, sa matag usa. Ug hinaut . . .

¹⁸⁵ Ginapangamuyo ko kini Kanimo, Amahan, nga ang matag tawo nga ania karong buntaga, nga nakadungog kanako nga nagsugilon niining maong panan-awon, hinaut nga matagbo ko sila pag didto na ako sa pikas nga bahin; bisan pa nga tingali dunay mga kalalaken-an dinhi nga dili mouyon kanako, ug mga kababayan-an, usab. Apan, Amahan, dili unta kana makababag sa among dalanon. Hinaut nga mahinagbo namo sila Didto, ug managduol usab, sila, ug maghinangopay kami sa usa’g usa, nga magasinggit, “Bililhon namong igsoon.” Itugot nga mamahimong sama gayud sa niadtong gipakita Didto, Ginoo, para sa matag-usa, sa tanan nga akong gihigugma, ug sa tanan nga naghigugma kanako. Ginaampo ko nga mamahimong ingon

niadto unta, Ginoo. Ug gihigugma ko gayud silang tanan. Itugot nga mamaatua sila didto, Amahan. Ingon nga ginatanyag ko kanila karon ang Kinabuhing Walay Katapusan. Hinaut nga buhaton unta nila ang ilang bahin, ang pagdawat Niini. Kay ako kining ginapangamuyo sa Ngalan ni Jesus. Amen.

¹⁸⁶ Aduna na lang kita'y pipila ka gutlo, aron maiampo ang mga may sakit. Makita ko nga adunay usa ka luoy'ng, masakiton nga batang babaye, ug usa ka gining usab diha sa wheelchair.

¹⁸⁷ Bueno, sa akong pinaka bililhon nga mga kaissoonang lalaki, mga igsoong babaye, hinaut unta nga dili n'yo ako masayup pagsabot. Ako—wala man ko kabalo sa kung unsay nahitabo. Wala gyud ko kabalo kung unsay nahitabo. Apan, Dios, pagmamatay na ako, pabalika ako Didto. Paadtos intawon ako niadtong Dapit, nga ginatinguha kong maaadtoan, kon asa man kadto. Wala ako gapaniguha nga mamahimong usa ka Pablo nga gilalin kaniadto paingon sa ikatulong kalangitan. Dili ingon-ana ang akong ginasulti. Kondili nagatoo ko nga ginapaninguhaan lang sa Dios nga dasigon ako, nga ginahatagan ako og diyutay'ng butang aron makapadayon ako, sa bag-o kong ministerio nga nagasugod na.

¹⁸⁸ Mora ba og ingon nga walay-pagtahud kung aduna ùsa ko'y basahon dinhi, sa makadiyut lang? Okey lang ba? Usa sa pinakananguna sa mga magasin sa nasud, si Billy Graham:

¹⁸⁹ “*Si Doktor Billy Graham Gidapit Ngadto Sa Islam*, dinhi sa unang panid sa *The Afrikaans Times*, ika-kinse sa Pebrero, 1960. Ang magsusulat niining maong artikulo, nga usa ka Moslem, Mohammedan, nagahunahuna nga ang mga milagro kono kinahanglan nga monunot sa pagwali sa Ebanghelyo ni Cristo, nga mao sa gihapon kagahapon, karon, ug hangtud sa kahangturan. Atong kutloon: ‘Ingon niini: Gisaad ni Cristo sa Iyang mga sumusunod, kaniadtong miingon Siya, “Ang nagatoo Kanako, ang mga buhat nga Akong ginabuhat pagabuhaton usab niya; labi pa gani ka dagkung mga buhat kay niini ang iyang pagabuhaton.” Nabuhat ba sa Iglesia ang maong mga buhat, nga, mga—mga kinaiyahan mismo ni Cristo sa Biblia? Mahimo ba gihapon Niini sa karon? Aduna ba'y iglesia nga mapaila ang kaugalingon niini nga lahi gyud, pinaagi sa pagbuhat og bisan katunga sa mga milagro nga gipamuhat ni Cristo kaniadto, bisan dili na hisgotan kining “labi pang dagku nga mga buhat”? Mahimo mo ba, ingon nga usa ka indibiduwal, inila, nga representante sa mga Cristohanon, nga ipatindog, bangonon ang patay na ngadto sa pisikal nga kinabuhi niini? Mahimo mo bang molakaw ibabaw sa dagat? Mahimo mo bang ayohon ang mga may sakit ug hatagan og igtatan-aw ang mga buta? Dili ba mao man kini, sumala sa nauna nang gikaingon nga sayup, nga gipahayag sa mga Mohammedan? O gipresentar, o, ang maong pamatuod ni Cristo . . .? . . . sa mga sumusunod maingon sa mga ginapamahayag sa uban, o sa inyong pagtulon-an?’ Halos tibukok

sa maong artikulo nga gisulat niining Moslem klaro lang nga sunod-sunod nga sayup nga mga pagpahayag.”

¹⁹⁰ Gipanghimakak nila kining maong hagit sa Moslem, pero husto man siya. Ug ania ang ilang gisulti:

¹⁹¹ “Ang pinakamaayo nga tubag mao ang basahon ang Biblia, ug hibaloon sàb ang Koran. Ang Koran wala gyud. . . sa. . . kung itandi gyud. Ang pahayag nga ang Mohamedanismo bantugan ug ginalabwan pa ang Cristianismo, usa gayud ka,” (p-a-n-g-h-a-m-b-o-g) “panghambog,” (sa tan-aw ko), “imahinasyon ra. Hinoon ang maong magsusulat, bisan pa man, nahisgotan niya ang mahinungdanong punto mahitungod sa mga milagro nga kabahin sa Iglesia. Apan ania usab nga ginaduhaduhan namo ang sinseridad sa magsusulat, tungod kay kinsa ba ang makatudlo ug makalalis sa mga milagro nga gipamuhat ni Rev. William Branham sa atubangan mismo sa mga Moslem sa South Africa, kaniadtong napulo ka libo ang midawat kang Cristo ingon nga Manluluwas ilalum sa ministerio ni William Branham, didto sa Durban, South Africa, ug sa kung asa pa man sa tibuok kalibutan, o sa kang T. L. Osborn sa East Africa? Tinuod, sinto porsyento namong ginasuportahan si Billy Graham. Pero nagahisgot lang kita sa hilisgotanan, nga walay. . . Kini nga hilisgotanan wala ma’y kapuslanan.”

¹⁹² Apan taliwala sa tanan niana (Gitawag nila ako. . . miingon nga mga panatiko kono kita, og wala kono kita masayod sa atong ginabuhat.), pero nagpamatuod baya sila, sa ila mismong mantalaan, nga ang Dios mismo ang namuhat niadto, bisan pa man. Tungod ang Dios mao ra man gihapon nga Dios, sa karong panahon, sama sa kung unsa Siya kaniadto. Mahimong hunahunaon n’yo nga sila wala nagatoo niini, nga sila wala nakakita niini. Pero dili gayud kini maililong; tungod wala man kini nahitabo nga diha ra sa usa ka suok. Ug gatusan ka linibo nga mga tawo nga atua didto, ang nakasaksi mismo niini. Sa dihang nasaksihan nila kadtong bakul, og nag-antus nga batang lalaki nga miduol didto, nga gisulti kaniya sa Balaang Espiritu ang mahitungod sa iyang kinabuhi, ug ubang mga butang, ug kung unsa pa’y nahitabo didto. Ug nakita mismo ang napulo ka libo nga mga Moslem nga nanagyukbo sa yuta, nanaghapa, para dawaton si Jesus Cristo ingon nga personal nilang Manluluwas.

¹⁹³ Hangtud karon aduna sa gihapon kita’y mga T. L. Osborn, ug uban pa, nga nagapakaon sa gihapon og pang-karnerong-Pagkaon. Sa hunahuna ko mora’g wala pa nakasangyaw si Igsoong Osborn didto sa taliwala sa mga Moslem. Ginapamahayag nila nga sila kono ang pinakadaghan na. Apan aduna kita sa gihapon og Dios nga arang makaluwas sa karnero gikan sa leon, og arang makaluwas sa karnero gikan sa oso.

¹⁹⁴ Maayo baya ang gibati ko ang mahibaloan nga nagsulat sila bahin niadto ug giila kadto. Dili, ginapatoo nila ang ilang

kaugalingon nga wala nila makita; mipahilayo lang sila ug mitalikod, ug miingon, “Ah, milabay na man ang ingon nianang mga adlaw.”

¹⁹⁵ Miingon ang Moslem, “Mao ba? Kung ingon ang tibuok Biblia diay pan-os na. Sayup diay kamong tanan. Ang inyong ginasimba diay usa man ka Tawo, usa ka Tawo nga patay na, ug ang Iyang Ngalan mao si Jesus. Ug namatay Siya, daghang mga katuigan na ang milabay, ug wala gyu’y ingon nianang butang nga Siya nabanhaw.”

¹⁹⁶ Pero dili gyud sila makasulti og ingon niana sa panagtigum didto sa Durban. Tungod atua man Siya didto nga ginabuhat ang mao rang butang nga Iyang gibuhat kaniadto, og pagpamatuod gyud kadto para kanila. Mao nga karon bisan ang—ang mga denominasyon mopahinungod gyud niadto, gani ang mismong tawo nga nagsulat ug nagsulti kanako nga kinahanglan kono nakong susihon sa Biblia ang akong ginapanudlo, mao mismo ang nagsulat niadto sa ilang mantalaan. Himoon mismo sa Dios nga modayeg sila Kaniya, sa unsa mang paagi, nga sama niana, bisan unsa pa. Husto kana. Padayegon gyud Niya sila Kaniya, sa unsa mang paagi.

¹⁹⁷ Aduna kita og usa ka luoy’ng, masakiton nga batang babaye nga ania na dinhi. Imo ba kanang anak? Unsa diay sakit niya, igsoon? [Nagaingon ang igsoong babaye, “Sige nga pagdugo sa utok.”—Ed.] Ma’am? [“Pagdugo sa utok.”] Pagdugo sa utok. [“Nagsulat na ako kanimog, pipila na ka tuig ang milabay, mahitungod sa pagdugo sa iyang utok.”] Oh, diay. [“Dugay na siyang nagsakit, ngani mag-upat na ka tuig karong Agosto.”] Upat na ka tuig, karong Agosto. [“Giduaw na siya ni Igsoong Neville kaniadto aron makita siya.”] Oh, mao ba kadtong sa Marengo, o sa kon asa man didto? [“Paoli.”] Sa Paoli. Mao diay kini nga batang babaye, kaniadto? Aduna lamang og bugtong butang, nanay, nga makaluwas sa niining batang babaye: kana mao, ang ilhon siya sa Dios. [“Mas miarang-arang na man siya kaysa kaniadto.”] Nalipay ako kung ingon niana.

¹⁹⁸ Imo na diay siyang giadtoan kaniadto para maiampo, Igsoong Neville? [Nagaingon si Igsoong Neville, “Oo, sir.”—Ed.] Sukad niadtong miduaw si Igsoong Neville ug nag-ampo para kaniya, miarang-arang na siya. Aduna gyud sa gihapon og mga magbalantay nga nahibalo sa Pagkaong-pang-karnero.

¹⁹⁹ Unsa ma’y imong sakit, minahal nga igsoong babaye, nga nagalingkod dinha sa imong, wheelchair? [Nagaingon ang usa pa ka igsoong babaye, “Aduna siya’y kanser.”—Ed.] Kanser.

²⁰⁰ Bueno, aduna lang ko’y ipangutana kaninyo, tingali dinhi ra mismo. Pila man ang ania dinhi nga naayo na sa. . . sa kanser? Ipataas n’yo ang inyong mga kamot. Tan-aw dinhi, igsoon. [“Halos bungol na siya, ug mao nga dili niya madungog ang imong ginasulti.”—Ed.]

²⁰¹ Ang Dios man mao ang Mananambal. Nasayod kita niana. Kung moingon ko kaninyo nga mahimo kong monaug dinha ug wagtangon kanang pagdugo sa utok sa batang babaye ug ayohon siya, o, kaha mahimo kong wagtangon ang kanser sa maong babaye, nan sayup gyud ang ginasulti ko kaninyo. Apan duna ko'y usa ka butang nga nahibaloan, adunay usa ka oso kaniadto (usa ka kanser, usa ka tumor, usa ka pagkabuta, ug bisan kamatayon) ang misakmit sa pipila ka karnero sa Dios, usa niana ka adlaw, ug gigukod ko kadto pinaagi sa gahum sa Dios, ug akong gipatay kadto ug gidala'g balik ang maong karnero. Tinuod kana. Ug karon moadto usab kita, dili pinaagi og unsa man nga dakung butang nga, *ingon niini-ug-ingon niana*. Kondili moanha ako pinaagi sa usa ka yanong gamay nga lamboyog sa pag-ampo. Siya na ang magpabalik kaniya.

²⁰² Nagatoo ka niana, dili ba, igsoon? Nagatoo ka, usab, dili ba, igsoon? Karon pila man kaninyo ang nagatoo sa bug-os n'yong kasingkasing?

²⁰³ Karon iduko n'yo ang inyong mga ulo samtang magaampo ako.

²⁰⁴ Minahal nga Amahan, ania ang usa ka matahum nga batang babaye, nga dili na gyud makalakaw pa, o makalihok-lihok man, gawas kon Imo siyang tabangan. Gisakmit siya sa kaaway. Wala na'y mahimo kaniya ang si kinsa man nga doktor. Gidagit siya sa kaaway sa ingon na kaayo ka halayo, hangtud nga wala na gayu'y mabuhat ang doktor. Apan dili gyud siya halayo sa Imong mahimong buhaton, Ginoo. Ania siya mismo sa kon asa mahimo Mong iabot ang Imong kamot diha kaniya. Sumala mismo sa Pulong sa Dios, ginapandong ko ang akong mga kamot nganhi niining batang babaye, ug ginahinginlan kining pagdugo sa utok. Sa Ngalan ni Jesus Cristo, ipahibalik siya ngadto sa pagkahimong usa na ka normal nga babaye pag-usab. Mabuhi pa siya alang sa kahimayaan sa Dios. Hinaut nga mamaayo siya, nga makalakaw na pasulod ug pagawas niining simbahan, sama sa uban pa nga nagatambong dinhi, nga susama niini, nga nagahatag og pagdayeg sa Dios. Mamaingon gyud kini, pinaagi ni Jesus Cristo.

²⁰⁵ Ingon nga namuti na ang iyang buhok, nga diyutay'ng pagtuyok na lamang, ug mamaatua na siya niadtong Yuta didto kon diin akong nakita nga wala na'y mga tigulang, kondili mga batan-on na lamang. Pero ania ang iyang mga minahal sa kinabuhi, nga nagahilak, ug gihigugma gyud nila siya. Ug tungod nga may usa ka dakung kaaway ang misakmit kaniya ug midagit kaniya hangtud nga wala na'y mahimo ang doktor, niining usa ka makahahadlok nga leon nga kanser. Dios, mianhi ako, para kaniya. Mianhi ako aron ipahibalik siya. Ginapatay ko ang leon nga kanser, sa Ngalan sa walay-pagkapildi nga Cristo, nga Kaniya ako usa ka pinadala. Hinaut nga mobiya na kini sa maong babaye, ug hinaut nga mamaayo na siya, ug

mabuhi sa daghan pang mga katuigan, gikan karon, alang sa kadunggan ug kahimayaan sa Dios, pinaagi ni Jesus Cristo nga among Ginoo.

²⁰⁶ Karon, Langitnong Amahan, dili pinaagi sa dakung hinagiban, ni sa pinasinaw nga bangkaw, o sa pinulongan man ug bokabukaryo sa usa ka hanas nga mamumulong, kondili pinaagi gayud sa usa ka yano ra, og gamay'ng lamboyog sa pagtoo. Mianhi ako alang niini nga kalag, ug niini nga lawas nga gisakmit sa kaaway nga kanser nga wala na'y mahimo ang doktor para kaniya. Apan mianhi gyud ako para kaniya, niining buntaga, Ginoo, aron dalhon siya og balik ngadto sa malandong og lunhaw nga sibsibanan ug tubig nga malinaw. Sa Ngalan sa mananaug nga si Jesus, og ingon nga Iya akong pinadala. Ingon nga may tinuod nga pagtoo, nagatoo ako nga mapahibalik gayud siya, pinaagi sa gahum niining pag-ampo nga among gihimo. Mamaingon gyud kini . . . ? . . .

²⁰⁷ (Nagatoo ko nga mora'g adunay panerbisyo sa pagbautismo. Aduna ba?) [Nagaingon si Igsoong Neville, "Oo, sir. Dunay duha ka magwawali nga nagdala og pipila ka tawo para bautismohan."—Ed.]

²⁰⁸ Mahimo n'yo bang ihangad ùsa ang inyong ulo sa makadiyut? Duna man gud og gisulti kanako ang pastor . . .

²⁰⁹ Kini nga mga tawo nga nagmasakiton gyud, kaayo. Mamaayo sila. Basta ayaw lang . . . Mamaayo gyud. Wala nagakapakyas ang saad sa Dios. Mao nga nagaanhi kita alang kanila.

²¹⁰ Magpahigayon pa sila og panerbisyo sa pagbautismo. Pero aduna na'y pipila ka mga tawo nga kinahanglan nang molakaw. Hinoon magpahigayon pa man kita og panerbisyo pag-usab unyang gabii.

²¹¹ Aduna ba dinhi nga dili na makatambong unyang gabii, og gusto nga maghalad kami og pag-ampo para kaninyo karon, sa mga dili na makaanhi unyang gabii? Mahimo ra ninyo nga moduol dinhi mismo, kamong mga dili na makatambong unyang gabii. Aduna ako'y daghang oras; para magpahigayon og linya sa pagpaampo, unyang gabii. Bautismohan na nila kining maong mga tawo.

²¹² Aduna ka'y batang lalaki dinha? Sige. [Nagaingon ang usa ka igsoong lalaki, "Okey lang ba kung ihatag ko kini kanimo?"—Ed.] Oo, igsoon. Salamat, kaayo. Okey lang ba kung unya ko pa kini basahon o karon na mismo? Salamat, sir.

²¹³ Karon kung hatagan n'yo lang kami og usa o duha pa ka minuto, nan ipahigayon na namo ang—ang panerbisyo para sa—para sa pagbautismo. Kabalo ko nga gusto ninyo nga masaksihan kini.

²¹⁴ Ug kadtong mga naninguha nga magpabautismo karong buntaga, bueno, kamo, ang mga kababayen-an moanhi *dinhi* dapit aron mag-ilis sa ilang mga bisti, ug ang mga kalalaken-an usab moanhi *dinhi niini* nga bahin. Ug dayon samtang mag-aampo ako para niining mga may sakit, mahimo na usab ninyong mag-andam para sa panerbisyo sa pagbautismo. Ug karon kanila nga . . .

²¹⁵ Bueno, unyang gabii, paningkamotan kong magpahigayon og—og linya sa pagpaampo, unyang gabii, sa gilayon, sa dihadiha nga makasulod na sila. Ug sugdan na nato ang ika-1 nga Basahon sa Mga Taga-Efeso, unyang gabii. Ug malipay gayud kami nga makauban kamo, kung wala man kamo’y simbahan nga ginatambongan. Apan kung aduna na kamo’y kaugalingon n’yong pastor ug simbahan, nan kamo—tambong gyud mo sa maanindot n’yong simbahan nga inyong ginasuportahan.

²¹⁶ Kamo usab nga kinahanglan nang molakaw, ug kinahanglan nang mohawa niining orasa mismo, panalanginan kamo sa Dios. Duaw lang mo *dinhi* kanamo pag-usab kon mahimo na ninyo. Malipay gyud kami nga makauban kamo.

²¹⁷ Igaampo ka ba, usab, igsoon? Unsa ma’y sakit nimo? Taas nga presyon sa dugo.

²¹⁸ Karon, ang uban pa kaninyo, iduko n’yo ang inyong ulo, sa makadiyut, og mag-ampo kita.

²¹⁹ Amahan, ginapasalamatan ko Ikaw, karon, tungod sa gamay’ng lamboyog sa magbalantay, ang pag-ampo nga maoy nagpaluhod sa leon, ug nabawi gikan kaniya ang gamay’ng karnero, ug napahibalik ngadto sa inahan ug amahan niini. Ginaampo ko ang among igsoong lalaki. Ginapangamuyo ko nga Imo siyang dalhon nga luwas, usab, Ginoo. Hinaut nga mawagtang na ang presyon sa dugo ug mga sakit sa iyang lawas. Ginabawi ko usab siya, Ginoo, para dalhon siya og balik, sa Ngalan ni Jesus Cristo. Mamaingon niana gyud kini. Amen.

Panalanginan ka sa Dios, igsoon.

Samtang nagaduol ka, nakita ko nga duna ka’y ginagunitan nga usa ka, buta nga batang lalaki.

²²⁰ Aduna pa diay ko’y gustong isulti. Aduna man gud ko’y . . . grabe kaayo ang akong gibati niadto, nagasuka pud ko. Ug nahunahuna ko . . . Dili ko gustong masayloan ninyo kini, kung mahimo lang unta. Nahunahuna ko, “Dios, unsa ma’y akong ikaalagad kung aduna ko’y madungog nga mohunong sa gawas? Dayon moingon ang akong asawa, ‘Billy, dunay usa ka tigulang nga lalaki nga mianhi para duawon ka.’

²²¹ “Ug ania nagasulod ang gamayo’ng, opaw nga lalaki nga may ubanon na nga balbas sa tibuok niyang nawong. Mosulod siya, og moingon, ‘Ikaw ba si Igsoong Branham?’

“Moingon ko, ‘Oo, sir, ako ni.’

222 “Simon diay ang akong ngalan.’ Ipandong ra niya ang iyang kamot nganhi kanako, ug motan-aw kanako sa makadiyut. Moingon, ‘Usa ikaw ka magtotoo, Igsoong Branham.’

“‘Oo.’

223 “Mamahimong okey na ang tanan.’ Kon si Simon Pedro kadto, sa Biblia. Grabe gyud ang pagpasalamat ko kung ingon niana! Wala na siya’y daghang isulti. Basta ipandong lang niya ang iyang kamot nganhi kanako, og mamaayo na ako.”

224 Ug dayon misantop kanako, pinaagi sa tabang sa Dios, ug sa grasya sa Dios, nga aduna usab og napulo ka linibo nga mga tawo ang nagatoo sa mao gihapong butang, kung makaadto lang unta ko kanila. Ug nahunahuna ko, “Ginoo, tugoti ako nga makaadto sa tanan kanila kutob sa mahimo ko, kung ingon niana. Tugoti lamang—lamang ako . . .”

225 Nahunahuna ko, “Kung si Simon man, o kaha si Pablo, o si kinsa man kanila, ang moabot ug moingon, ‘Ikaw ba si Igsoong Branham?’

“‘Oo.’

226 “Ipandong ang ilang mga kamot nganhi kanako, ug motan-aw kanako, ug moingon, ‘Okey na, Igsoong Branham,’ og molakaw na.

227 “Maulian gyud ako. Mamaayo gyud ako. Sigurado. Moingon ko . . .Aba, malig-on gyud sa gilayon ang akong kadasig. Moingon ako, ‘Mamaayo na ako.’” Oo, sir.

228 Ug aduna gayu’y mga tawo karon nga nagatoo nianang mao gihapong butang. Ug mao kana’y akong gianhi dinhi nga buhaton, ang pandongan kamo og mga kamot, og mangamuyo sa Dios.

229 Gusto kong himamaton kining batang lalaki, sa makadiyut, igsoon. Usa baya siya ka luoy’ng, buta nga batang lalaki. Unsa na ba ka dugay siya nga nabuta? [Nagaingon ang igsoong babaye, “Sukad pa sa iyang pagkahimugso.”—Ed.] Sukad pa diay sa pagkahimugso.

230 Kumusta ka, batang lalaki! Oh, pagkabuutan, nimo nga bata . . .? . . .

231 Oh maloloy-ong Dios! Ingon nga dili na makakab-ot ang mga doktor, tungod nga sa pagkahimugso pa lang niining batang lalaki, natawo man siya nga buta na, ug dili siya makakita; kining matahum, og buutan nga batang lalaki. Ug ang kaaway, sa wala pa man magkaaduna og kahigayonan sa kinabuhi kining gamay’ng bata, gidagit na siya nga dili na makab-ot sa mga doktor. Busa, mianhi ako para kaniya, niining buntaga, Ginoo. Pinaagi niining yanong, gamay nga lamboyog sa pag-ampo. Tugoti ako nga mapahibalik siya, Dios. Ginaatubang ko ang kaaway, ang yawa, sa Ngalan ni Jesus Cristo, ug ginabawi ko kining batang lalaki alang sa Dios. Ginabawi ko ang iyang

panan-aw, alang sa Dios, og ginabalik kaniya ang giilog ni Satanas gikan kaniya. Hinaut nga maangkon na niya kini. Sa Ngalan ni Jesus Cristo, mamahitabo gayud. Bueno, mamaingon niana gyud kini.

²³² Bueno, minahal, nga igsoong babaye, karon, ayaw gyud pagduhaduha bisan gamay nga kining batang lalaki mamaayo gayud. Ug gusto ko nga, dalhon nimo siya'g balik dinhi sa simbahan, ug ipakita sa mga tawo, nga siya'y makakita na, ha, mahimo mo ba?

Ginahatag ko kaniya ang iyang panan-aw, sa Ngalan ni Jesus Cristo...?...

²³³ Ginoong Jesus, pagapandongan... Kining maong bata nga among gitanyagan og daghang mga pag-ampo! Apan, niining buntaga, nagaduol ako pag-usab sa Ngalan ni Jesus Cristo, nga dala-dala kining gamay'ng lamboyog nga gihatag Mo kanako. Ug Imo na akong gitabangan pinaagi niini, Ginoo, pinaagi usab sa Imong Gahum, nga bawion ang... gikan sa baba sa kanser, gikan mismo sa baba sa kamatayon, og gipabangon usab ang patay human nga gideklara nga patay na, ug nagbuy-od nga migahi na ug bugnaw na. Akong ginagukod kining kaaway, sa Ngalan ni Jesus Cristo. Busa ipahibalik Mo unta siya sa maayong panglawas pag-usab, Ginoo. Itugot kini. Hinaut nga mamahitabo kini, alang sa kahimayaan sa Dios.

²³⁴ Ug igaampo pud ka? [Nagapakig-istorya ang usa ka igsoong babaye kang Igsoong Branham—Ed.] Usa ka ba ka magtotoo? ["Oo."] Ginoo, ginadala ko siya, pinaagi sa mahimo niining gamay'ng lamboyog. Sa Ngalan ni Jesus Cristo, hinaut nga mobiya na kaniya ang maong balatian ug dili na gayud mabalik pa.

²³⁵ [Nagapakig-istorya ang usa ka igsoong babaye kang Igsoong Branham—Ed.] Bueno, pinaagi sa mao gihapong gamay'ng lamboyog, nga gilamboyog ug nagsalbar kang Igsoong Harley, ug para usab sa imong anak nga babaye ug kanimo mismo.

²³⁶ Karon, Langitnong Amahan, ginagukod ko ang kaaway, gamit kining gamay'ng lamboyog nga gihatag Mo kanako, kay miingon man Ka, "Kung mapatoo mo lang ang mga tawo, ug magmatinuuron lang sa dihang magampo ka," moigo gayud kanang gamay'ng bato ngadto sa patyanan nga bahin. Hinaut nga moigo kini karon, Ginoo, samtang ako kining ginalamboyog paingon sa iyang hangyo. Sa Ngalan ni Jesus Cristo, hinaut nga mamaingon gyud kini. Amen.

²³⁷ [Nagapakig-istorya ang usa ka igsoong babaye kang Igsoong Branham—Ed.] Sige, igsoon. Karon kita'y... Wala ma'y mahimo ang mga doktor nianang pagkanerbiyos. Hinoon mahimong aduna sila'y ihatag kanimo aron medyo mapakalma ka, pero magpagrabe lang gyud kana kanimo, pagkahuman. Oo. Karon

ania. Ato kanang hinginlan, niining buntaga. Pagahinginlan kana; aron mapahibalik ka. [Blangko nga bahin sa teyp.]

²³⁸ Ginoong Jesus, . . . [Blangko nga bahin sa teyp—Ed.] . . . ania ang lima ka gagmay'ng bato, f-a-i-t-h [pagtoo—Tigh.], ug ang lamboyog sa pag-ampo. Ug ginapahibalik ko ang akong igsoong babaye gikan sa pagsakmit sa pagkanerbiyos . . . ? . . . didto. Ginapahibalik ko siya ngadto sa kalinaw ug sa malandong og lunhaw nga mga sibsibanan ug tubig nga malinaw. Ginabuhat ko kini sa Ngalan ni Jesus Cristo. Amen.

[Nagapakig-istorya ang usa ka igsoong babaye kang Igsoong Branham—Ed.]

²³⁹ Amahang Dios, para niining batang babaye, nalipay gyud kami nga dili kini muscular dystrophy. Apan bisan unsa pa kini, makab-ot Mo gihapon kini, Ginoo. Ug mianhi ako nga dala ang gamay'ng lamboyog sa pagtoo, ug kining bato. Ug ilabay ko kining bato uban sa tibuok kong kusog nga mailabay kini. Sa Ngalan ni Jesus Cristo, hinaut nga maigo niini ang puntirya niini. Hinaut nga mamaayo na ang among igsoong babaye. Ginabuhat ko kini sa Ngalan ni Jesus Cristo.

[Nagapakig-istorya ang usa ka igsoong babaye kang Igsoong Branham—Ed.]

²⁴⁰ Ania kining batan-ong inahan, ug ang gamay niyang anak, usa ka gamay'ng bata nga ginatinguha niya nga matagbo didto, sa pikas nga bahin, sa nianang mahimayaong Yuta nga bag-ohay ko lang gihisgotan, ug sila . . . Ang maong inahan dili na mabuhi hangtud sa . . . mapadaku pa unta niya kining gamay'ng bata, ug dili usab mabuhi og dugay ang maong gamay'ng bata kon wala ang Imong tabang. Apan mianhi ako nga may dala nga lamboyog, uban sa tibuok kong kusog ug tinguha nga akong mapuntirya ang kaaway. Ug sa Ngalan ni Jesus Cristo, ilamboyog ko kini sa kaaway. Mamaayo gayud sila, alang sa kahimayaan sa Dios. Sa Ngalan ni Jesus. Amen.

[Nagapakig-istorya ang usa ka igsoong babaye kang Igsoong Branham—Ed.]

²⁴¹ Oh, maanindot gayud. Nalipay ako niana. Bueno, kana nga ministerio, kung ingon-niana, mao ang pinakahalangdon nga ministerio sa pagtudlo sa mga tawo. Nagpahinungod kana sa mga buhat . . . ? . . .

²⁴² Among Langitnong Amahan, gidagit ni Satanas kining luoy'ng inahan nga dili na makab-ot sa mga doktor. Mahimo lang nilang maghatag og tambal nga magpakalma, Ginoo, pero igo pud nga modaut kaniya, og modaut gayud, nga dili na niya halos mahibaloan kon asa na siya. Ug dayon sa dihang anaa na siya'y panimuut, magkagrabe pa hinoon siya. Apan mianhi ako nga dala kining lamboyog sa pagtoo, nga dunay kauban nga bato, og diretso kining ipuntirya, aron masentro gayud ang maong target. Sa Ngalan ni Jesus Cristo, ginahinginlan

ko kining pagkanerbiyos diha kaniya, alang sa kahimayaan sa Dios. Amen.

[Adunay usa nga nagapakig-istorya kang Igsoong Branham—Ed.]

²⁴³ Minahal nga Dios, ingon nga si Igsoong George nagahigda didto, nga naghimalatyon na, dili pa lang dugay, nakita ko mismo kung unsay nabuhat kaniya sa pagtoo. Karon aduna siya’y rayuma, Ginoo. Nasayod kami nga mahimo nila siyang hatagan og cortisone, o unsa man nga medyo makapahupay sa kangutngot, apan dili gyud kana ang makawagtang sa maong balatian. Busa among ginapunting kini nga pag-ampo, sa Ngalan ni Jesus Cristo. Hinaut nga mawala na ang rayuma. Hinaut nga mopauli siya nga mamaayo na.

Salamat, igsoon.


²⁴⁴ Kumusta ka, pinangga? [Nagapakig-istorya ang usa ka igsoong babaye kang Igsoong Branham—Ed.] Oh, grabe! Pagkabungol. Makadungog ka pa ba sa unsa mang paagi? Uh-huh. Dili na gayud makab-ot sa mortal nga kaalam! Usa ka ba ka magtotoo sa Ginoong Jesus? [“Amen.”] Makita ko ang usa ka maanyag nga babaye Didto, usa sa niining mga adlaw. Mamahimo ka nga batan-on pag-usab hangtud sa kahangturan. Nasayod ko nga ginatinguha mong magkinabuhi alang sa Iyang kahimayaan. Magabalik sa usa ka . . .

²⁴⁵ [Nagaingon ang igsoong babaye, “Dili, nagamasulob-on ako tungod sa akong anak nga lalaki.”—Ed.] Sa anak mong lalaki. [“Sobra duha ka tuig na siya nga nawala.”] Wala diay nimo siya makit-i? [“Anaa na man siya sa kamot sa Dios.”] Oh, siya—mitaliwan na diay siya? [“Uh-huh. Sa walog sa kamatayon.”] Oh, diay. [“Ug grabe ang akong pagkamasulob-on.”] Nagamasulob-on gyud ka. Oo. [“Nagamasulob-on ako. . .nagamasulob-on gayud ako. Ug nabati ko, nga kung itugot man sa Dios, gusto ko unta nga kuhaon na Niya ako. Wala na ako’y unsa man gawas sa kalipay nga anaa diha Kaniya.”]

²⁴⁶ Minahal nga igsoong babaye, gusto ko nga mapahimutang ka sa dapit nga maanindot na ang imong ginabati. Nadungog ba niya ang bahin sa panan-awon, niining buntaga? [Nagaingon ang usa pa ka igsoong babaye, “Makadungog man siya og maayo.”—Ed.] Sige, sultihi siya.

²⁴⁷ Bueno, isulti ra niya kanimo kung unsay nahitabo. Sa pikas nga bahin sa imong gininhawa dinhi, nagahulat na kanimo ang bililhon mong batang lalaki. Mamahimo ka na nga batan-on sama niya. Gugma, higugmaa lang ang. . . [Nagaingon ang igsoong babaye, “Dili ko na gusto nga magdugay pa. Gusto ko nang moadto kaniya, kung itugot man sa Dios.”—Ed.]

²⁴⁸ Minahal nga Langitnong Amahan, patapos na ang iyang lumba sa kinabuhi. Wala na gyud kaayo siya’y nahibilin. Ug ang bililhon niyang anak nga lalaki, nga atua na sa tabok sa

suba, kung makalingi lang unta siya dinhi, moingon gyud siya, “Pipila na lamang ka adlaw.” Ang maong inahan nagahulat na sa sakayan, Ginoo, nga magadala kaniya latas sa panganod, paingon niadtong mahimayaon nga Yuta. Panalangini siya, Amahan, ug lipaya ang iyang kasingkasing. Ug hinaut nga mahitabo na kanang usa ka mahimayaon nga panagkitaay pag-usab, didto mismo sa tabok sa suba. 

ANG SINALIKWAY NGA HARI CEB60-0515M
(The Rejected King)

Kining Mensahe ni Igsoong William Marrion Branham, una giwali sa Ingles niadtong Dominggo sa buntag, Mayo 15, 1960, didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2021 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org